

四庫全書

史部

欽定四庫全書

水經注釋卷五

仁和趙一清撰

河水五 漂水

又東至鄧湛水從北來注之

河水又東逕河陽縣故城南春秋經書天王狩于河陽壬申公朝于王所晉侯執衛侯歸于京師春秋左傳僖公二十八年冬會于溫執衛侯是會也晉侯召

襄王以諸侯見且使王狩仲尼曰以臣召君不可以訓故書曰天王狩于河陽言非其狩地服虔賈逵曰

河陽溫也班固漢書地理志司馬彪袁山松

一清按通鑑晉

紀吳國內史袁崧胡三省曰袁崧當作袁山松此本晉書列傳耳按傳袁山松有名無字諸本亦有作崧者豈山松即崧之字而以字行者也郡國志晉太康地道記十州志河

陽別縣非溫邑也漢高帝六年封陳涓為侯國王莽之河亭也十三州志曰治河上河孟津河也郭緣生述征記曰踐土今治坂城是名異春秋焉非也今河北

見者河陽城故縣也在冶坂西北蓋晉之溫地故羣
儒有溫之論矣魏土地記曰冶坂城舊名漢祖渡城
嶮固南臨孟津河洛陽西北四十二里故鄧鄉矣河
水又逕臨平亭北帝王世紀曰光武葬臨平亭南西
望平陰者也河水又東逕洛陽縣北河之南岸有一
碑北面題云洛陽北界津水二渚分屬之也上舊有
河平侯祠祠前有碑今不知所在郭頌世語曰晉文
王之世大魚見孟津長數百步高五丈頭在南岸尾

在中渚河平侯祠即斯祠也河水又東逕平縣故城

北漢武帝元朔三年封濟北貞王子劉遂為侯國

沈氏

曰漢表作濟北式王子此從史表又史表貞王子十一人其五人漢表以為式王子莫可考也王莽

之所謂治平矣俗謂之小平也有高祖講武塲河北

側岸有二城相對置北中郎府徙諸徒隸府戶并羽

林虎賁領隊防之河水南對首陽山春秋所謂首戴

也夷齊之歌所矣曰登彼西山上夷齊之廟前有

二碑並是後漢河南尹廣陵陳導洛陽令徐循與處

士平原蘇騰南陽何進等立事見其碑

全氏曰按續漢書五行志

注引蔡邕作夷齊廟碑熹平五年天下大旱禱諸名山處士平陽蘇騰字玄成夢陟首陽有神馬之使在道明覺而思之以夢陟上聞詔使者登山升祠天尋雨是即善長所云事具其碑也然是平陽非平原攷洪氏隸釋所引則是平原又有周公廟魏氏起元武觀於芒垂張

景陽元武觀賦所謂高樓特起竦踣岩甍直亭亭以孤立延千里之清飈也朝廷又置冰室於斯阜室內有水井春秋左傳曰日在北陸而藏冰常以十二月採冰於河津之隘峽石之阿北陰之中即邠詩二之

日鑿氷冲冲矣而内於井室所謂納於凌陰者也河
南有鉤陳壘世傳武王伐紂八百諸侯所會處尚書
所謂不期同時也紫微有鉤陳之宿主鬪訟兵陣故
道甲攻取之法以所攻神與句陳并氣下制所臨之
人則袂禽敵是以壘資其名矣河水至斯有盟津之
目論衡曰武王伐紂升舟陽侯波起疾風逆流武王
操黃鉞而麾之風波畢除中流白魚入于舟熿以告
天與八百諸侯咸同此盟尚書所謂不謀同辭也故

曰孟津亦曰盟津尚書所謂東至于孟津者也又曰富平津晉陽秋曰杜預造河橋於富平津所謂造舟為梁也又謂之曰陶河魏尚書僕射杜畿以帝將幸許試樓船覆於陶河謂此也昔禹治洪水觀於河見白面長人魚身出曰吾河精也授禹河圖而還於淵及子朝篡位與敬王戰乃取周之寶玉沈河以祈福後二日津人得之於河上將賣之則變而為石及敬王位定得玉者獻之復為玉也河水又東溟水入焉

山海經曰和山上無草木而多瑤碧實惟河之九都
是山也五曲九水出焉合而北流注于河其陽多倉
玉古神泰逢司之是好居於萑山之陽出入有光呂
氏春秋曰夏后氏孔甲田於東陽萑山遇大風雨迷
惑入于民室皇甫謐帝王世紀以為即東首陽山也
蓋是山之殊目矣今於首陽東山無水以應之當是

今古世懸川域改狀矣

全氏曰按魏書地形志曰武德郡溫縣有貝水予謂善長

尚未能詳貝水之顛末則地形志所言亦襲舊文書之耳竊疑是溴梁之溴水而誤為貝字蓋溴水正流

入河支流入濟適當溫原之地善長偶有不照遽引
山經之言滑突了之而云無水以應川域改狀則不
識涓水之為誤文也昔帝堯修壇河洛擇良議沈率舜等升於

首山而導河渚有五老遊焉相謂河圖將來告帝以
期知我者重瞳也五老乃翻為流星而升於昴即於
此也又東涕水注焉

又東過鞏縣北

河水於此有五社渡為五社津

一清按章懷後漢書注引水經注曰五社

津一名土社津蓋異名也

建武元年朱鮪遣持節使者賈彊討難

將軍蘇茂將三萬人從五社津渡攻溫馮異遣校尉
與寇恂合擊之大敗追至河上生擒萬餘人投河而
死者數千人縣北有山臨河謂之崆嶺丘其下有穴
謂之鞏穴言潛通淮浦北達於河直穴有渚謂之鮪
渚成公子安大河賦曰鱣鯉王鮪暮春來遊周禮春
薦鮪然非時及佗處則無故河自鮪穴已上又兼鮪
稱呂氏春秋稱武王伐紂至鮪水紂使膠鬲侯周師
即是處也

洛水從縣西北流注之

洛水於鞏縣東逕洛汭北對琅邪渚入於河謂之洛口矣自縣西來而北流注河清濁異流皦焉殊別應瑒靈河賦曰資靈川之遐源出崑崙之神丘涉津洛之阪泉播九道於中州者也

又東過成臯縣北濟水從北來注之

河水自洛口又東左逕平臯縣南又東逕懷縣南濟水故道之所入與成臯分河河水又逕黃馬坂北謂

之黃馬關孫登之去楊駿作書與洛水故人處也河水又東逕旋門坂北今成臯西大坂者也升涉此坂而東趨成臯也曹大家東征賦曰望河洛之交流看成臯之旋門者也河水東逕成臯大仵山下爾雅曰山一成謂之仵許慎吕忱等並以為丘一成也孔安國以為再成曰仵亦或以為地名非也尚書禹貢曰過洛汭至大仵者也鄭康成曰地喉也沆出仵際矣然則大仵在河內修武武德之界沆沆之水與滎播

澤出入自此然則大伾即是山矣

禹貢錐指曰鄭玄云大伾在修武武

德之界張揖云成皋縣山也漢書音義有臣瓚者以爲修武武德無此山也成皋縣山又不一成今黎陽縣山臨河豈不是大伾乎又曰薛士龍曰大伾山許慎說文今黎陽之黎山是其說不始于臣瓚矣今按大伾二字說文俱無伾字下引詩以車伾伾伾字下云丘再成者與孔傳同並無薛所稱語慎有五經異義或出其中然宋時此書已忘薛何由見且鄭康成生于慎後張揖三國魏人可見漢魏時未有指黎山爲大伾者寔臣瓚倡之酈元猶不從從瓚自穎達始此後人勝前人處薛所稱疑是徐錯說文繫傳語出楚金誤爲叔重耳又云大伾山在汜縣西一里有大澗九曲一名九曲山西去洛口裁四十里非禹貢之大伾山

明甚 伾北即經所謂濟水從北來注之者也今涕

水自温縣入河不於此也所入者奉溝水耳即泲沈

之故瀆矣

禹貢雖指曰濟水於武德入河南直成皋今汜水河陰之界是也其後由温縣入河

則南直鞏縣所謂津渠勢改不與昔同者也今其故道盡陷河中濟水唯從枝津之合泲水者至孟縣東

南入河南直孟津縣其流益短矣由大禹而來濟入河之道凡再變成皋縣之故城在

任上縈帶任阜絕岸峻周高四十許丈城張翕嶮崎

而不平春秋傳曰制巖邑也虢叔死焉即東虢也魯

襄公二年七月晉成公與諸侯會于戚遂成虎牢以

逼鄭求平也蓋修故耳穆天子傳曰天子射鳥獵獸

於鄭圃命虞人掠林有虎在於葭中天子將至七萃之士高奔戎生擒虎而獻之天子命之為柙畜之東

虞

全氏曰按東虞漢志師古注作東號是也元和志引此文作東隅

是曰虎牢矣然

則虎牢之名自此始也秦以為關漢乃縣之城西北隅有小城周三里北面列觀臨河苔苔孤上景明中

言之壽春路直茲邑昇眺清遠勢盡川陸羈途遊至有傷深情河水南對玉門昔漢祖與滕公潛出濟於是處也門東對臨河側岸有土穴魏攻北司州刺史

毛德祖於虎牢戰經二百日不尅城惟一井井深四十丈山勢峻峭不容防捍潛作地道取井余頃因公至彼故往尋之其穴處猶存河水又東合汜水水南出浮戲山世謂之曰方山也北流東關水出于嵩渚之山也泉發于層阜之上二源兩枝分流瀉注世之石泉水也東流為索水西注為東關水西北流楊蘭水注之水出非山西北流注於東關水又西北清水分入焉水自東浦西流與東關水合而亂流注于汜汜

水又北右合石城水水出石城山其山複澗重嶺歌
疊若城山頂泉流瀑布懸瀉下有濫泉東流洩注邊
有數十石畦畦有野蔬巖側石窟數口隱跡存焉而
不知誰所經始也又東北流注于汜水汜水下北合
鄭水水西出婁山至冬則煖故世謂之溫泉東北流
逕田鄭谷謂之田鄭溪水東流注于汜水汜水又北
逕虎牢城東漢破司馬欣曹咎於是水之上汜水又
北流注于河征艱賦所謂步汜口之芳草弔周襄之

鄙館者也余按先儒之論周襄所居在潁川襄城縣是乃城名非為水目原夫致謬之由俱以汜鄭為名故也是為爽矣又按郭緣生述征記劉澄之永初記並言高祖即帝位於是水之陽今不復知舊壇所在盧湛雀雲亦言是矣余按高皇帝受天命于定陶汜水又不在此也於是求壇故無髣髴矣河水又東逕板城北有津謂之板城渚口河水又東逕五龍塢北臨長河塢有五龍祠應劭云崑崙山廟在河南滎陽

縣疑卽此祠所未詳

又東過滎陽縣北滾蕩渠出焉

大禹塞滎澤開之以通淮泗卽經所謂滾蕩渠也

氏全

曰以滎澤為禹所塞善長之謬極矣一清按禹貢豫州云滎波既豬禹陂水為澤故道元濟水注云大禹塞其淫水則指既豬而言此言禹塞滎澤辭不達意未為大非惟云開之以通淮泗則指鴻溝為禹迹乃其謬耳漢平帝之世河汴決壞未及得修汴渠東侵日

月彌廣水門故處在河中漢明帝永平十二年議治汴渠上乃引樂浪人王景問理水形便景陳利害應

對敏捷帝甚善之乃賜山海經河渠書禹貢圖及以錢帛後作堤發卒數十萬詔景與將作謁者王吳共築堤防修塌起自滎陽東至千乘海口千有餘里景乃商度地勢鑿山開澗防遏衝要疏決壅積十里一水門更相洄注無滲漏之患明年渠成帝親巡行詔濱河郡國置河堤員吏如西京舊制景由是顯名王吳及諸從事者皆增秩一等順帝陽嘉中又自汴口以東緣河積石為堰通古渠口咸曰金堤靈帝建寧

中又增修石門以遏渠口水盛則通注津耗則輟流

禹貢雖指曰司馬彪不志河渠東漢以後無可考據
賴有水經注存其所叙當時見行之河自京城縣長
壽津東逕鐵邱南至東北逕甲下邑北又東北入于
海皆東漢以後大河之所行也又曰王景修渠築堤
自滎陽東至千乘海口千餘里則其所治者即東漢
以後大河之經流也而史稱汴渠又曰汴渠成始終
皆不言河蓋建都洛陽東方之漕全資汴渠故惟此
為急河汴分流則運道無患治河所以治汴也自平
帝以後汴流東侵日月益甚建武十年陽武令張汜
上言河決積久侵毀濟渠漂數十許縣是其時濟亦
決敗矣莽時河入濟南千乘則侵濟處更多故築堤
自滎陽至千乘海口千餘里永平十三年詔曰河汴
分流復其舊迹陶邱以北漸就墳壤十五年景從駕
東巡至無鹽帝美其功拜河隄使者賜車馬縑錢陶

邛今定陶無鹽今東平皆濟水所經之地也二渠既成則東南之漕由汴入河舳舻千里輓輸不絕京師無匱乏之憂矣又曰武帝踈于討論執北漬為禹河及哀平之世人始有知禹河之所經者意欲復禹河道而國事阨危事不可為矣永平上距平帝時僅六十餘歲故道豈遽湮滅而王景治河惟從事汴濟蓋當時所急在運道就其便者為之不暇遠圖耳史稱景鑿山阜截溝澗防遏衝要疏決壅滯十里立一水門費以百億計財力之充裕若是向使講求禹迹故道而復之則河流歸北汴濟不勞而治功施到今五代以降潰溢橫流之禍可以免矣惜乎其見不及此也河雖徒自周定王時而東光以下至章武入海猶是徒駭之故道至王莽時始改從千乘入海而景遂因之禹迹蕩然無存君子於此有遺憾焉

又東北逕卷之扈亭北春秋左傳曰文公七年晉趙

盾與諸侯盟于扈竹書紀年晉出公十二年河絕於扈即於是也河水又東逕八激堤北漢安帝永初七年令謁者太山于岑於石門東積石八所皆如小山以捍衝波謂之八激堤河水又東逕卷縣北晉楚之戰晉軍爭濟舟中之指可掬楚莊祀河告成而還即是處也河水又東北逕赤岸固北而東北注之

又東北過武德縣東沁水從西北來注之

河水自武德縣漢獻帝延康元年封曹叡為侯國即

魏明帝也東至酸棗縣西濮水東出焉漢興三十有九年孝文時河決酸棗東潰金堤大發卒塞之故班固云文堙棗野武作瓠歌謂斷此口也今無水河水又東北通謂之延津石勒之襲劉曜途出於此以河水津為神靈之助號是處為靈昌津昔澹臺子羽齎千金之璧渡河陽侯波起兩蛟挾舟子羽曰吾可以義求不可以威劫操劍斬蛟蛟死波休乃投璧於河三投而輒躍出乃毀璧而去示無恠意趙建武中造

浮橋於津上採石為中濟石無大小下輒流去用功
百萬經年不就石虎親閱作工沈璧于河明日璧流
渚上波蕩上岸遂斬匠而還河水又逕東燕縣故城
北石濟水自北來注之河水於是有棘津之名亦謂
之石濟津故南津也春秋僖公二十八年晉將伐曹
曹在衛東假道于衛衛人不許還自南河即此濟也
河水於是亦有石濟之名晉伐陸渾亦於此渡宋元
嘉中遣輔國將軍蕭斌率寧朔將軍王玄謨北入宣

威將軍垣護之以水軍守石濟即此處也

一清按石濟資治通

鑑作文石津懷帝紀永嘉四年石勒為王瓚所敗退屯文石津胡三省曰據帝紀文石津在河北又據永嘉六年勒自葛陂北行至東燕使孔長自文石津潛渡枋頭取向永船則文石津在東燕之東北枋頭之東南蓋濟者津渡之名非四瀆之濟并非常山之石濟也

河水又東淇水入焉又

東逕遮害亭南漢書溝洫志曰在淇水口東十八里

有金隄隄高一丈自淇口東地稍下隄稍高至遮害

亭高四五丈又有宿胥口舊河水北入處也河水又

東右逕滑臺城北

一清按何氏焯曰自滑臺城北至長壽津皆古漯也胡東樵亦以為

然詳見河水又東至東光縣故城西而北與漳水合下城有三重中小城謂之

滑臺城舊傳滑臺人自修築此城因以名焉城即故

鄭廩延邑也下有延津春秋傳曰孔悝為蒯瞶所逐

載伯姬于平陽行于延津是也

一清按今本左傳哀公十六年載伯姬于

平陽而行及西門無于延津字蓋鄆氏所見之書異矣

廩津南故城即衛之平

陽亭也今時人謂此津為延壽津宋元嘉中右將軍

到彥之留建威將軍朱修之守此城魏軍南伐修之

執節不下其母悲憂一旦乳汁驚出母乃號踴告家

人曰吾年老非有乳時今忽如此吾兒必沒矣修之
絕援果以其日陷沒城故東郡治續漢書曰延熹九
年濟陰東郡濟北平原河水清襄楷上疏曰春秋注
記未有河清而今有之易乾鑿度曰上天將降嘉應
河水先清京房易傳曰河水清天下平天垂異地吐
妖民厲疾三者並作而有河清春秋麟不當見而見
孔子書以為異河者諸侯之相清者陽明之徵豈獨
諸侯有窺京師也明年宮車晏駕徵解濟侯為漢嗣

是為靈帝建寧四年二月河水又清也

又東北過黎陽縣南

黎侯國也詩式微黎侯寓于衛是也晉灼曰黎山在其南河水逕其東其山上碑云縣取山之名取水之陽以為名也王莽之黎蒸也今黎山之東北故城蓋黎陽縣之故城也山在城西城憑山為基東岨於河故劉楨黎陽山賦曰南蔭黃河左覆金城青壇承祀高碑頌靈昔慕容元明自鄴率衆南徙滑臺既無舟

楫將保黎陽昏而流澌水合於夜中濟訖旦而冰泮
燕民謂是處為天橋津東岸有故城嶮帶長河戴延
之謂之暹明壘周二十里言暹明石勒十八騎中之
一城因名焉郭緣生曰城袁紹時築皆非也余按竹
書紀年梁惠成王十一年鄭釐侯使許息來致地平
邱牖戶首垣諸邑及鄭馳道我取枳道與鄭鹿即是
城也今城內有故臺尚謂之鹿鳴臺又謂之鹿鳴城
王元謨自滑臺走鹿鳴者也濟取名焉故亦曰鹿鳴

津又曰白馬濟津之東南有白馬城衛文公東徙渡
河都之故濟取名焉袁紹遣顏良攻東郡太守劉延
於白馬關公為曹公斬良以報効即此處也白馬縣
有韋鄉韋城故津亦有韋津之稱史記所謂下修武
渡韋津者也河水舊於白馬縣南洑通濮濟黃溝故
蘇代說燕曰決白馬之口魏無黃濟陽竹書紀年梁
惠成王十二年楚師出河水以水長垣之外者也金
隄既建故渠水斷尚謂之白馬瀆故瀆東逕鹿鳴城

南又東北逕白馬縣之涼城北者舊傳云東郡白馬縣之神馬亭實中層時南北二百步東西五十許步狀邛斬城也自外耕耘墾斫削落平盡正南有躔陁陟上方軌是由西南側城有神馬寺樹木修整西去白馬津可二十許里東南距白馬縣故城可五十里疑即開山圖之所謂白馬山也山下常有白馬羣行悲鳴則河決馳走則山崩注云山在鄭北故鄭也所未詳劉澄之云有白馬塞孟達登之長歎可謂於川

土踈妄矣亭上舊置涼城縣治此白馬瀆又東南逕
濮陽縣散入濮水所在決會更相通注以成往復也
河水自津東北逕涼城縣河北有般祠孟氏記云祠
在河中積石為基河水漲盛恒與水齊戴氏西征記
曰今見祠在東岸臨河累石為壁其屋宇容身而已
殊似無靈不如孟氏所記將恐言之過也河水又東
北逕伍子胥廟南祠在北岸頓丘郡界臨側長河廟
前有碑魏青龍三年立河水又東北為長壽津述征

記曰涼城到長壽津六十里

河之故瀆出焉

禹貢雖指曰按水經東漢人所撰凡稱故瀆者皆時已無水咸城以下東光以

上河水不至又無他水行其中孟康所云王莽時空者唯此耳故謂之大河故瀆其自長壽津以西至宿胥口為東漢見行之河則叙入河水東光以北至章武為清河漳水之所行則叙入清河漳水並不列大河故瀆

漢書溝洫志曰河之為中國害尤甚故導河自積石

歷龍門驪二渠以引其河一則漯川今所流也一則

北瀆王莽時空故世俗名是瀆為王莽河也

一清按驪史記

河渠書作廡索隱曰漢書作灑史記舊本亦作灑字從水韋昭云疏決為灑字音疏跬反顏師古音山支

反然則醜字近本之誤耳漢書溝洫志注孟康曰醜分也分其流泄其怒也二渠其一出貝丘西南折者也其一則漯川也河自王莽時遂空唯用漯耳故瀆東北逕戚城西春秋哀

公二年晉趙鞅率師納衛太子蒯聩于戚宵迷陽虎曰右河而南必至焉今頓丘衛國縣西戚亭是也為衛之河上邑漢高帝十二年封將軍李必為侯國矣

一清按史記索隱曰戚漢志闕地道記屬東海又曰案灌嬰傳云重泉人李必此云李必誤也然則酈注所引是漢書列傳而表亦作李必與史表同漢書百官公卿表元狩四年戚侯李信成為太常即必曾孫又史記灌嬰傳索隱曰姚氏云按漢紀桓帝延熙二

年追錄高祖功臣李必後黃門丞李遂為晉陽關內

侯則作李姓者是也又戚是衛邑東海亦有之地理志東海郡戚縣注引鄭氏曰音憂戚故城在山東滕縣西南五十里本秦縣史記曹參嘗遷為戚令是也此戚在今開州北七里李必封邑當在東海如小司馬說姚氏察也鄭氏德也故瀆又逕繁陽縣故城東史記趙將廉

頗伐魏繁陽者也北逕陰安縣故城西漢武帝元朔五年封衛不疑為侯國故瀆又東北逕昌樂縣故城

東地理志東郡之屬縣也

一清按漢志東郡有樂昌縣後漢省今本作昌樂縣

誤舊唐書地理志以為晉置昌樂而晉志不載魏書地形志昌樂縣太和二十一年分魏置似非漢縣

漢宣帝封王稚君為侯國

一清按褚表樂昌侯王稚君名武平昌侯王長君弟

也索隱曰表在汝南按地理志汝南無樂昌蓋誤證也徐廣曰細陽之池陽鄉也細陽汝南郡之屬縣

故瀆又東北逕平邑郭西竹書紀年晉烈公四年沈

曰當作趙城平邑五年田公子居思伐邯鄲圍平邑

十年齊田肸及邯鄲韓舉戰于平邑邯鄲之師敗遁

獲韓舉取平邑新城又東北逕元城縣故城西北而

至沙丘堰史記曰魏武侯公子元食邑於此故縣氏

馬朱氏謀瑋箋曰公子元食邑於此出漢書地理志

應劭注非史記也一清按漢志常山郡元氏縣下
師古又引闕駟云趙公子元之封邑故曰元氏史記
趙世家惠成王十一年城元氏洪邁容齋隨筆疑之

曰二邑命名不應相似如此竊謂關駟十二州志之說多本仲瑗或誤以魏為趙師古兩引之非矣郭

東有五鹿墟墟之左右多臨城公羊曰襲邑也說曰襲隘矣郡國志曰五鹿墟故沙鹿有沙亭周穆王喪盛姬東征舍於五鹿其女叔姓屆此思哭是曰女姓之丘為沙鹿之異名也春秋左傳僖公十四年沙鹿崩晉史卜之曰陰為陽雄土火相乘故有沙鹿崩後六百四十五年宜有聖女興其齊田乎後王翁孺自濟南徙元城正直其地日月當之王氏為舜後土也

漢火也王禁生政君其母夢見月入懷年十八詔入
太子宫生成帝為元后漢祚道汙四世稱制故曰火
土相乘而為雄也及崩大夫揚雄作誄曰太陰之精
沙鹿之靈作合於漢配元生成者也漢獻帝建安中
袁紹與曹操相襲於官渡紹逼大司農鄭元載病隨
軍屆此而卒郡守已下受業者衰經赴者千餘人元

注五經讖緯候歷天文經通於世故范曄贊曰孔書

遂明漢章中輟矣

一清按後漢書贊云元定義垂褒
修禮缺孔書遂明漢章中輟是卷

曹褒鄭元合傳故章懷注云中較謂曹褒禮不行也則漢章句何與於康成乎牽連引之實為詞句之累

縣北有沙丘堰者

禹貢錐指曰水經以王莽河為禹河故以沙丘堰為禹迹推其意似

謂古河本東行禹作此堰以障之使北而九河自此播馬不遵其道是為降水唐人云河自貴鄉縣界分為九道宗此說也然禹河不經元城此堰必非禹所作黃文叔云今澶州臨河有蘇隄自黎陽入北至恩州清河歷亭皆有之然則降水者自元城以北隄竭之水是也蓋以堰為蘇所作或曰元城為戰國魏地北與趙接壤賈讓云隄防之作近起戰國壅防百川各以自利齊與趙魏以河為境趙魏瀕山齊地卑下作隄遏水使西泛趙魏趙魏亦為隄以防之沙邱堰疑趙所作以障水使不得北而注于齊魏所謂以隣國為壑者也全氏曰此下有脫文當補尚書北過降水之故道也十字觀下文注云不遵其道曰降是言

降水而濁漳水注中論降水曰館陶北出屯氏河其
故道與是明以沙丘堰一帶為降水故竊取其義補
此一句一清按全說是也寰宇記魏州大名縣下云
本漢元城縣地水經注云沙丘堰在貴鄉今本無之
則知此處有脫誤通典魏州治貴鄉元城二縣貴鄉
有大河故瀆俗曰玉莽河魏書地形志司州魏尹貴
鄉縣天平二年分館陶置治趙城上去孝昌三年已
九年矣道元所不及知元和志云後魏孝文分元城
置方輿紀要云五代志前燕慕容暉置屬昌樂郡則
是先曾置縣旋廢復立于天平二年地形志略前著
後殆為疎矣且道元恪守班固漢志魏郡鄴縣下分
注云故大河在東北故大河即大河故瀆今注無鄴
縣是知其缺失多矣東樵不察注文縣北有沙丘堰
者與下不遵其道曰降義不連屬以意測識不亦誣
乎

不遵其道曰降亦曰瀆堰障水也至於大陸北播

為九河

古文尚書疏證曰按水經注河水篇凡五叙至長壽津而止下便乃大河故瀆故瀆皆周

漢以來之新道非禹河故道也然中有至于大陸北播于九河經文及注一段上不與元城縣沙丘堰相次下不與沙丘堰南分屯氏河出焉相次分明經注別有及禹河故道者惜不傳耳偶聞于黃子鴻鷺曰某謀水經注三十年從未聞此論參以濁漳水條詳北過涿水是禹河自大伾以下至入海處了了然見于經注或當日有意互見或後人任意錯簡一清按潛邛既不識縣北有沙丘堰者下有脫文又不悟此九字是注混作經蓋水經一書從無直鈔禹貢經文之例其審諦猶未精于考核爾

風俗通曰

河播也昔禹治洪水播為九河自此始也禹貢兗州

九河既道謂徒駭太史馬頰覆釜胡蘇簡潔勾盤馬

津也同為逆河鄭元曰下尾合曰逆河言相承受矣
蓋所潤下之勢以通河海及齊桓霸世塞廣田居同
為一河故自堰以北館陶瘦陶貝丘禹般廣川信都
東光河間樂成以東城地並存川瀆多亡漢世河決
金堤南北離其害議者常欲求九河故迹而穿之未

知其所以班固云自茲距漢北七八枝者也

禹貢
雖指

曰許商云徒駭在成平漳水即徒駭古之九河並東
北出至章武高城柳縣之東合為逆河入海及周定
王時河徙自東光南皮浮陽絕八枝而北合徒駭漢
人指此為逆河是九河之所同故王莽改勃海郡曰

迎河郡南皮縣曰迎河亭而其實非也以意度之徒駭大勢北行亦迤東八枝太史最北宜最短向南則漸加長禹津最南最長首受大河當在南宮縣界也要之九河所在後人率多附會馮遂云九河既滅難明班固云自茲距漢北亡八枝酈道元云城地並存川瀆多亡斯為實錄無俟深求

河之故瀆自沙丘堰南分屯氏河出焉

河水故瀆東北逕發干縣故城西又屈逕其城北王

莽之所謂戢楯矣漢武帝以大將軍衛青破右賢王功封其子登為侯國大河故瀆又東逕貝邱縣故城南應劭曰左氏傳齊襄公田于貝丘是也余按京相

璠杜預並言在博昌即司馬彪郡國志所謂貝中聚者也應注於此事近違矣大河故瀆又東逕甘陵縣故城南地理志之所謂厓也王莽改曰厓治者也漢安帝父孝德皇以太子被廢為王薨於此乃其葬地尊陵曰甘陵桓帝建和元年改曰甘陵縣亦取名焉

一清按是注殊欠分曉續漢志清河國劉昭補注云高帝置桓帝建和二年改為甘陵又云甘陵故厓安帝更名則是安帝更名厓縣為甘陵縣而桓帝改清河國為甘陵國也後漢書清河孝王慶傳亦云梁冀惡清河名乃改為甘陵於文當云尊陵曰甘陵縣亦取名焉桓帝建和二年改清河國曰甘陵方合是

周之甘泉市地也陵在瀆北邱墳高巨雖中經發壞猶若層陵矣世謂之唐侯冢城曰邑城皆非也昔南陽文叔良以建安中為甘陵丞夜宿水側趙人蘭襄夢求改葬叔良明循水求棺果於水側得棺半許落水叔良顧親舊曰若聞人傳此吾必以為不然遂為移殯而去之大河故瀆又東逕艾亭城南又東逕平晉城南今城中有浮圖五層上有金露盤題云趙建武八年比釋道龍和上竺浮圖澄樹德勸化興立神

廟浮圖以壞露盤盤尚存煒煒有光明大河故瀆又東北逕靈縣故城南王莽之播亭也河水於縣別出為鳴犢河大河故瀆又東逕郇縣故城東呂后四年

以父嬰功封子佗襲為侯國

一清按史記惠景間侯者年表俞侯嬰子佗襲

功用太中大夫侯謂佗襲父功為侯耳漢書高惠高后文功臣表俞侯呂佗可知佗只單名郇注連佗襲為稱蓋其誤也王莽更名之曰善陸大河故瀆又東逕平原

縣故城西而北絕屯氏三瀆北逕繹幕縣故城東北

西流逕平原鬲縣故城西地理志曰鬲津也

一清按漢志云

平當以為馬津王莽名之曰河平亭故有窮后羿國也應劭

曰馬偃姓咎繇後

全氏曰按先贈公曰有馬氏當是夏之同姓應氏以為偃姓恐非若

以為有窮之國則竟大謬矣

光武建武十三年封建義將軍朱祐

為侯國大河故瀆又北逕修縣故城東又北逕安陵

縣西本修之安陵鄉也地理風俗記曰修縣東四十

里有安陵鄉故縣也又東北至東光縣故城西而北

與漳水合

禹貢錐指曰禹釀二渠自黎陽宿胥口始一北流為大河一東為漯川周定王五年

河徙自宿胥口東行漯川右逕滑臺城又東北逕黎陽縣南又東北逕涼城縣又東北為長壽津河至此

與漯別行而東北入海水經謂之大河故瀆大河故瀆東北逕戚城西至東光縣故城西而北與漳水合故城在今東光縣東淇水篇云清河自東光縣西南又東北右會大河故瀆濁漳水篇云漳水自阜城縣故城北又東北逕成平縣南又東北入清河故大河也大河自宿胥口徙流至成平合漳水復歸禹河故道又東北歷浮陽參戶平舒至章武入海定王五年歲己未下逮王莽始建國三年辛未而北瀆遂空凡六百七十二歲

一水分大河故瀆北出為屯氏河逕館陶縣

東東北出漢書溝洫志曰自塞宣防河復北決於館陶縣分為屯氏河廣深與大河等成帝之世河決館及東郡金隄上使河堤謁者王延世塞之三十六日

河堤成詔以建始五年為河平元年以延世為光祿大夫是水亦斷屯氏故瀆水之又東北屯氏別河出焉屯氏別河故瀆又東北逕信成縣張甲河出焉地

理志曰張甲河故瀆

一清按漢志分注無故瀆字蓋道元所加

首受屯氏

別河於信成縣者也張甲河故瀆北絕清河於廣宗縣分為二瀆左瀆逕廣宗縣故城西又北逕建始縣

故城東田融

全氏曰按五代志燕太傅長史田融著題書

云趙武帝十二

年立建興郡治廣宗置建始興德五縣隸焉左瀆又

北逕經城東繚城西又逕南宮縣西北注絳瀆右瀆
又東北逕廣宗縣故城南又東北逕界城亭北又東
北逕長樂郡武彊縣故城東長樂故信都也晉太康
五年改從今名

一清按長樂郡不見
晉志地形志云晉改

又東北逕廣川

縣與屯氏河水故道合又東北逕廣川縣故城西又
東逕棘津亭南徐廣曰棘津在廣川司馬彪曰縣北
有棘津城呂尚賣食之困疑在此也劉澄之曰譙郡
鄆縣東北有棘津亭故邑也呂尚所困處也余按春

秋左傳伐巢克棘入州來無津字杜預春秋釋地氏全

曰杭世駿曰杜預書名釋例所謂釋地特其中一種耳當作釋例予謂非也引班書者但云地理志引續書者或云郡國志莫之非也然則又言棘亭在鄆縣引釋例而但云釋地庸何傷乎

東北亦不云有津字矣而竟不知澄之於何而得是

說然天下以棘為名者多未可咸謂之棘津也又春

秋昭公十七年晉侯使荀吳帥師涉自棘津用牲于

洛遂滅陸渾杜預釋地闕而不書服虔曰棘津猶孟

津也徐廣晉紀又言石勒自葛陂寇河北襲汲人向

水於枋頭濟自棘棘津在東郡河內之間田融以為
即石濟南津也雖千古茫昧理世元遠遺文逸句容
或可尋沿途隱顯方土可驗司馬遷云呂望東海上
人也老而無遇以釣于周文王又呂望行年五十賣
食棘津七十則屠牛朝歌行年九十身為帝師皇甫
士安云欲隱東海之濱聞文王善養老故入釣于周
今汲水城亦言有呂望隱居處起自東海迄于豐雍
緣其逕趣趙魏為密厝之譙宋事為疎矣

一清按名
勝志引水

經注云清河又東北逕棗強縣故城西又東北逕棘
 津津上有古臺者舊相傳呂望薳臺疑是清水篇
 注之逸文又司馬彪郡國志云清河國廣川縣故屬
 信都有棘津城劉昭補注云太公呂尚困於棘津城
 在琅瑯海曲非此城也琅瑯國西海縣補注引博物
 記云太公望所出今有東呂鄉又釣于棘津其浦尚
 存西海縣即前漢之海曲縣也今莒州日照縣是
 真所謂東海者矣道元以劉澄之之說為非今觀昭
 注較鄭氏為尤密也

張甲故瀆又東北至修縣東會清河十三

州志曰張甲河東北至修縣

一清按漢志作修分注作脩顏師古曰音條

入清漳者也屯氏別河又東枝津出焉東逕信成縣
 故城南又東逕清陽縣故城南清河郡北魏自清陽

徙置也又東北逕陵鄉南又東北逕東武城縣故城

南又東北逕東陽縣故城南地理志曰王莽更之曰

胥陵矣俗人謂之高黎郭非也應劭曰東武城東北

三十里一清按淇水篇注引應劭語作西南七十里兩情互異有陵鄉故縣也

又東散絕無復津逕屯氏別河又東北逕清河郡南

又東北逕清河故城西漢高帝六年封王吸為侯國

一清按史表清陽侯王吸索隱曰漢表作清河地理志清陽清河郡之屬縣也寰宇記云後漢甘陵國除復為縣晉省于厝城西南十七里置清河縣魏又移清河縣并清河郡于故厝城中又云清陽漢縣後漢

并入甘陵西晉省甘陵于此置清河郡理清陽縣地
復漢名今注云漢封王吸為清河侯蓋用漢表

理風俗志曰甘陵郡東南十七里有清河故城者世

謂之鵲城也

一清按續漢志云甘陵故厝鵲城即厝城之轉音師古曰厝音趨亦及又

東北逕繹幕縣南分為二瀆屯氏別河北瀆東逕繹

幕縣故城南東絕大河故瀆又東北逕平原縣枝津

北出至安陵縣遂絕屯氏別河北瀆又東北逕重平

縣故城南應劭曰重合縣西南八十里有重平鄉故

縣也又東北逕重合縣故城南又東北逕定縣故城

南漢武帝元朔四年封齊孝王子劉成為侯國

一清按成

史漢表皆作越史表云謚敬漢表云謚敷索隱曰說文云敷讀如躍今說文敷音芳无切無躍音疑誤也嘗攷當作敷字中山靖王子有臨樂敷侯光齊太史敷徐廣音躍可證也地理風俗記曰

饒安縣東南三十里有定鄉城故縣也屯氏別河北

瀆又東入陽信縣今無水又東為咸河東北流逕陽

信縣故城北地理志勃海之屬縣也東注于海屯氏

別河南瀆自平原東絕大河故瀆又逕平原縣故城

北東北枝津右出東北至安惠縣界東會商河屯氏

別河南瀆又東北于平原界又有枝渠右出至安惠縣遂絕屯氏別河南瀆自平原城北首受大河故瀆東出亦通謂之篤馬河即地理志所謂平原縣有篤馬河東北入海行五百六十里者也東北逕安惠縣故城西又東北逕臨齊城南始東齊未賓大魏築城以臨之故城得其名也又屈逕其城東故瀆廣四十五步又東北逕重丘縣故城西春秋襄公二十五年秋同盟于重丘伐齊故也應劭曰安惠縣北五十里有

重丘鄉故縣也又東北逕西平昌縣故城北北海有

平昌縣故加西

一清按漢志有兩平昌縣一屬平原郡一屬瑯琊郡續志北海國平昌侯

國故屬瑯琊而平原郡無之平原郡九縣數之適合是省并也晉志平原國西平縣蓋今誤本脫去昌字地形志安德郡平昌縣下云二漢晉屬平原後漢晉曰西平昌是西平昌之名沿于典午而遂波及于後

漢爾漢宣帝元康元年封王長君為侯國
沈氏曰漢表是地節四年

善長蓋從褚表王長君名無故
故渠川派東入般縣為般河蓋亦九

河之一道也漢書稱公孫瓚破黃巾于般河即此瀆

也一清按當作後漢書又漢志注如淳曰般如面般之般韋昭曰音逋垣反師古曰爾雅說九河云鈞

般郭璞以為水曲如鉤流般桓也然今土俗用如韋之音又東為白鹿淵水南北

三百步東西千餘步深三丈餘其水冬清而夏濁溇而不流若夏水洪泛水深五丈方乃通注般瀆焉又

逕般縣故城北王莽更之曰分明也東逕樂陵縣故

城北地理志曰故都尉治伏琛晏謨言平原邑今分

為郡又東北逕陽信縣故城南東北入海屯氏河故

瀆自別河東逕甘陵之信鄉縣故城南地理志曰順

帝更名安平一清按此是應劭注本云信都國明帝更名樂安安帝改曰安平國馬彪郡國

志安平國故信都延光元年改延光
為安帝紀年非順帝也道元誤矣
應劭曰甘陵西

北十七里有信鄉故縣也屯氏故瀆又東逕甘陵縣
故城北逕靈縣北又東北逕鄒縣與鳴犢河故瀆合
上承大河故瀆於靈縣南地理志曰河水自靈縣別
出為鳴犢河者也東北逕靈縣東東入鄒縣而北合
屯氏瀆屯氏瀆兼鳴犢之稱也又東逕鄒縣故城北
東北合大河故瀆謂之靈鳴犢口十三州志曰鳴犢
河東北至脩入屯氏考瀆則不至也

一清按漢志魏
郡館陶縣下云

河水別出為屯氏河東北至章武入海過郡四行千五百里者也溝洫志元帝永光五年河決清河靈鳴攢口而屯氏河遂絕蓋屯氏河漢世絕後不復流行賴有水經及酈注猶存故道而別河而南北二瀆而張甲河亦得附見否則遺迹罔知名稱莫辨如師古所云隋室分析州縣誤以為毛氏河乃置毛州之失也

又東北右過衛縣南又東北過濮陽縣北瓠子河出焉

河水東逕鐵丘南春秋左氏傳哀公二年鄭窄達帥

師救衛郵無恤御簡子衛太子為右登鐵上望見鄭

師衛太子自投車下即此處也京相璠曰鐵丘名也

杜預曰在戚河南之北岸有聶城城戚邑也東城有子路冢河之西岸有竿城郡國志曰衛縣有竿城者也河南有龍淵宮武帝元光中河決濮陽汜郡十六發卒十萬人塞決河起龍淵宮蓋武帝起宮於決河之傍龍淵之側故曰龍淵宮也河水東北流而逕濮陽縣北為濮陽津故城在南與衛縣分水城北十里有瓠河口有金隄宣房堰粵在漢世河決金隄涿郡王尊自益州刺史遷東郡太守

一清按漢書王尊自徐州刺史遷東郡太守

非益州也

河水盛溢泛浸瓠子金隄決壞尊躬率民吏投

沈白馬祈水神河伯親執圭璧請身填隄廬居其上吏民皆走尊立不動而水波齊足而止公私壯其勇

節河水又東北逕衛國縣南東為郭口津

黃氏曰郭口一作國

口全氏曰亦作谷口方輿紀要晉太元十年秦符丕與普將檀元戰于谷口胡三省注谷口在枋頭西即此處也漢志河內郡隆慮縣國水東至信成入張甲河過郡三行一千八百四十里凡漢志之水大較皆見於水經注獨國水不著蛛絲馬跡蓋賴此文胡東燕求其詳而不得竟以淇水當之非也漢志淇出共而國出隆慮淇入大河而國入張甲河源流判然水經以淇出隆慮隆慮與共本屬接壤或是水源之互

見然未可遂以國水當之也東京以後張甲之潰已
枯而國水無所攷見道元亦遂失之使國水即是淇
水則遮害亭上淇已入河矣安
得至此又以國口名其津哉

河水又東逕郵城縣

北故城在河南一十八里王莽之郵良也沅州舊治
魏武創業始自於此河上之邑最為峻固晉八王故
事曰東海王越治郵城城無故自壞七十餘丈越惡
之移治濮陽城南有魏使持節征西將軍太尉方城
侯鄧艾廟廟南有艾碑秦建元十二年廣武將軍沅
州刺史闕內侯安定彭超立河之南岸有新城宋寧

朔將軍王玄謨前鋒入河所築也北岸有新臺鴻基
層廣高數丈衛宣公所築新臺矣詩齊姜所賦也為
盧關津臺東有小城崿嶇顛側臺址枕河俗謂之底
閣城疑故關津都尉治也所未詳矣河水又東北逕
范縣之秦亭西春秋經書築臺於秦者也河水又東
北逕委粟津大河之北即東武陽縣也

左會浮水故瀆

故瀆上承大河於頓丘縣而北出東逕繁陽縣故城

南應劭曰縣在繁水之陽張晏曰縣有繁淵

一清按漢志注

張晏曰其界為繁淵

春秋襄公二十年經書公與晉侯齊侯盟

于澶淵杜預曰在頓丘縣南今名繁淵

一清按春秋有兩澶淵襄

二十一年盟于澶淵杜預曰澶淵在頓丘縣南今名繁汀此衛地又近戚田二十六年傳云會于澶淵以討衛疆戚田此衛之澶淵也三十年會于澶淵宋災故許慎說文澶淵水在宋杜預亦云司馬彪郡國志沛國杼秋故屬梁有澶淵聚則非此繁汀也

澶淵即繁淵也亦謂之浮水馬

昔魏徙大梁趙以中年易魏故志曰趙南至浮水繁

陽即是瀆也

一清按書叙指南曰水經澶州地名曰龍芻今本無之蓋缺失矣

故瀆

東絕大河故瀆東逕五鹿之野晉文公受塊於野人
即是處矣京相璠曰今衛縣西北三十里有五鹿城

今屬頓丘縣

一清按杜預曰衛地有二五鹿一在元
城東一在衛縣西北寰宇記云元城東

為五鹿墟即重耳乞食處此
為五鹿城道元合而一之

浮水故瀆又東南逕衛

國邑城北故衛公國也漢光武以封周後也又東逕

衛國縣故城南古斟觀應劭曰夏有觀扈即此城也

一清按所謂觀扈是五觀漢志之畔觀與有扈同或
曰即太康姦子五人王應麟曰五子述大禹之戒以
作歌豈朱均管蔡比水經本之韋氏之說非也全祖
望曰夏時有斟觀得無以畔字之形近斟而誤乎

竹書紀年梁惠成王二年齊田壽率師伐我圍觀觀
降浮水故瀆又東逕河牧城而東北出郡國志曰衛
本觀故國姚姓有河牧城又東北入東武陽縣東入
河

又有漯水出焉

戴延之謂之武水也

一清按困學紀聞曰太史公班孟堅謂禹灑二渠以引其河一

貝邱一漯川李垂導河書曰東為漯川者乃今泉源
赤河北出貝邱者乃今王莽故瀆而漢塞宣房所行
二渠蓋獨漯川其一則漢決之起觀城入蒲臺所
謂武水也武水以漢武帝導河北流而得其名
地

理志曰漂水出東武陽縣

一清按地理志東郡東武陽縣下云禹治漂水無出

字漂始黎陽宿胥口不僅出此也應劭于平原郡漂陰縣注云出東武陽郡蓋誤以應說為班志也續志

亦云東武陽濕水出皆與班志異

今漂水上承河水於武陽縣東南

而北逕武陽新城東曹操為東郡所治也引水自東

門石竇北注于堂池池南故基尚存中城內又立一

石臺甚大城西門名水井門內曲中水井猶存門

外有故臺號武陽臺西臺亦有隅雉遺迹河水又東

逕武陽縣東范縣西而東北流也

一清按禹貢雖指曰河自此與漂別

東北逕東阿在平等縣至千乘入海此自西漢東以
迄後魏漯川之源委宋世河決商胡朝城流絕而舊
迹之存
者鮮矣

又東北過東阿縣北

河水於范縣東北流為倉亭津述征記曰倉亭津在
范縣界去東阿六十里魏土地記曰津在武陽縣東
北七十里津河濟名也河水又歷柯澤春秋左傳襄
公十四年衛孫文子敗八徒於柯澤者也逕東阿縣
故城西而東北出流注河水枝津東出謂之鄧里渠

也

又東北過荏平縣西

河水自鄧里渠東北逕昌鄉亭北逕礪礪城西述征記曰礪礪津名也自黃河泛舟而渡者皆為津也其

城臨水西南崩于河宋元嘉七年到彥之北入拔之

後失至二十七年以王玄謨為寧朔將軍前鋒入河

平礪礪守之都督劉義恭以沙城不堪守召玄謨令

毀城而還後更城之魏立濟州治此也

朱氏謀偉箋曰玉海引此

作魏置鎮守
名濟州關
河水衝其西南隅又崩于河即故荏平

縣也應劭曰荏山名也縣在山之平陸故曰荏平也

王莽之功崇矣經曰大河在其西鄧里渠歷其東

全氏

曰此蓋約舉鉢
子河篇經文即斯邑也昔石勒之隸師懼屯耕於

荏平聞鼓角鞞鞞之聲於是縣也而與聊城分河河

水又與鄧里渠合水上承大河於東阿縣西東逕東

阿縣故城北故衛邑也應仲瑗曰有西故稱東魏封

曹植為侯國

朱氏謀瑋箋曰按魏志曹植
自雍邱徙封東阿非侯國也

大城北門

內西側臬上有大井其巨若輪深六七丈歲嘗煮膠以貢天府本草所謂阿膠也故世俗有阿井之名縣出佳繒繅故史記云秦昭王服大阿之劍阿縞之衣也又東北逕臨邑縣與將渠合又北逕荏平縣東臨邑縣故城西北流入於河河水又東北流逕四瀆津津西側岸臨河有四瀆祠東對四瀆口河水東分洑亦曰洑水受河也然滎口水斷石門不通始自是出東北流逕九里與清水合故洑瀆也自河入洑自洑

入淮自淮達江水徑周通故有四瀆之名也昔趙

清一

按史記孔子世家及家語趙下當有歎字或簡子二字

殺鳴犢仲尼臨河而歎

自是而返曰丘之不濟命也夫琴操以為孔子臨狄

水而歌云狄水行兮風揚波船楫顛倒更相加余按

臨濟故狄也是濟所逕得其通稱也

于氏欽齊乘曰朱子韓文考異曰水

經河水至東阿荏平等縣東北流四瀆津灌注之河
水東分濟水受河蓋滎口水斷石門不通始自是出
與清水合昔趙殺鳴犢孔子臨河而嘆作歌曰狄之
水兮風揚波舟楫顛倒更相加歸來歸來胡為期臨
濟故狄也是濟所經得其通稱詳此則是濟水自滎
澤之下潛流至此四瀆津口而復出河又東分一支

與之合流以過臨濟而為狄水然此皆齊地在今濟
鄆之間史記以為孔子自衛將西見趙簡子則其道
不當出此又不可曉者今姑闕之以俟深於地理者
考焉按漢陳留郡平丘縣有臨濟亭故狄也蓋濟水
出陶丘北南被孟豬北瀆注巨野亭臨此瀆故曰臨
濟春秋時狄人據此因以名焉此水夫子所歌至王
莽時枯竭水經所謂濟枯渠注巨野者也其自巨野
至四瀆津與河合流者乃齊之清河水經所謂得其
通稱者是也漢十乘郡別有狄縣安帝更名臨濟唐
又別以漢東朝陽縣為臨濟今章丘之臨濟鎮也文
公蓋疑于此云 河水又逕楊虛縣之故城東俗猶謂是城曰
陽城矣河水又逕荏平城東城內有故臺世謂之時
平城非也蓋荏時音相近耳

又東北過高唐縣東

河水於縣漂水注之水自城東北逕東武陽縣故城

南

一清按此句文義難解蓋高唐漂水與東武陽漂水相承而有別禹貢雖指曰漢志東郡東武陽縣

下云禹治漂水東北至千乘入海又平原郡高唐縣下云桑欽言漂水所出今按禹引河自大伾山西折而北循大陸東畔入海而漂首受河自黎陽宿胥口始不起東武陽也自周定王五年河徙從宿胥口東行漂川至長壽津始與漂別其津以西漂水之故道悉為河所占而上游較短矣然河之故瀆不經東武陽亦不經高唐迨漢成帝建始末河決館陶由東武陽絕漂水而東北至高唐又絕漂水東北至千乘入海雖嘗塞治而故道猶存王莽始建國三年復決於此莽為元城冢墓計不堤塞明帝永平中王景修之

遂為大河之經流自是委粟津以西漂水之故道又為河所占上游益短矣漂水一出於東武陽再出于高唐據成帝以後言之耳觀此蓋知高唐在東武陽之東北漂水既至高唐不得復經東武陽抑或城東北上脫去涼字蓋河漂分流自涼城長壽津始也

應劭曰縣在武水之陽王

莽之武昌也然則漂水亦或武水矣滅洪為東郡太守治此曹操圍張超於雍邱洪以情義請袁紹救之不許洪與紹絕紹圍洪城中無食洪呼吏士曰洪於大義不得不死諸君無事空受此禍衆泣曰何忍舍明府也男女八千餘人相枕而死洪不屈紹殺洪邑

人陳容為丞謂曰寧與滅洪同日死不與將軍同日
生紹又殺之士為傷歎今城四周紹圍郭猶存水匝
隍塹於城東北合為一瀆東北出郭逕陽平縣之岡
城西郡國志曰陽平縣有岡城亭又逕陽平縣故城
東漢昭帝元年封丞相蔡義為侯國漂水又北絕莘
道城之西北有莘亭春秋桓公十六年衛宣公使伋
使諸齊令盜待于莘伋壽繼殞於此京相璠曰今平
原陽平縣北一十里有故莘亭道阨限蹊要自衛適

齊之道也望新臺於河上感二子於宿齡詩人乘舟誠可悲矣今縣東有二子廟猶謂之孝祠矣潔水又

東北逕樂平縣故城東縣故清也漢高帝八年封空

中於清

沈氏曰漢表作室中同徐廣云一作室中索隱曰室中姓也史表作室中脫同字宣

帝封許廣漢少弟翁孫于樂平

沈氏曰褚表作樂平班表作樂成屬平氏

與褚表異然則非原之清也一清按此是褚表之繆而道元誤承之者漢表樂成侯許延壽翁孫延壽字也褚少孫以為樂平樂平是霍山封邑非翁孫也詳具漳水篇吾于此更有一疑地理志東郡清縣師古注引應劭曰章帝更名樂平夫樂平既始自章帝則何以宣帝時封邑即有此稱且班固于外戚恩澤侯

霍山封邑明注云東郡則又非他處可知此皆事之不可以臆測者至清本屬東郡沈氏云平原亦誤也並為侯國王莽之清治矣漢章帝建初中更從今名

也潔水又北逕聊城縣故城西城內有金城周匝有

水南門有馳道絕水南出自外泛舟而行矣東門側

有層臺秀出雲表魯仲連所謂還高唐之兵郤聊城

之衆者也

一清按寰宇記博州聊城縣下云石柱後魏孝文所立為鄴東之表水經曰武水東

流從石柱北是也今本無之蓋缺失矣

潔水又東北逕清河縣故城北

地理風俗記曰甘陵故清河清河在南一十七里今

於甘陵縣故城東南無城以擬之直東二十里有艾
亭城東南四十里有此城疑即清河城也後蠻居之
故世稱蠻城也漂水又東北逕文鄉城東南又東北
逕博平縣故城南有層臺秀上王莽改之曰加睦也
右與黃溝同注川澤黃溝承聊城郭水水泛則津注
水耗則輟流自城東北出逕清河城南又東北逕攝
城北春秋所謂聊攝以東也俗稱郭城非也城東西
三里南北二里東西隅有金城城卑下墟郭尚存左

右多墳隴京相璠曰聊城縣東北三十里有故攝城
今此城西去聊城二十五六里許即攝城者也又東
逕文鄉城北又東南逕王城北魏太常七年安平王

鎮平原所築世謂之王城太和二十三年罷鎮立平

原郡治此城也

全氏曰按魏書地形志所謂太平鎮者也但据志則以太和十一年分屬

濟州非二十三年置也蓋罷鎮在是年而平原之為郡固久矣

黃溝又東北迤左與

漯水隱覆勢鎮河陸東出於高唐縣大河右迤東注

漯水矣地理志桑欽曰漯水出高唐余按竹書穆天

子傳稱丁卯天子自五鹿東征釣於漯水以祭淑人
是曰祭丘已己天子東征食馬於漯水之上尋其沿
歷逕趣不得近出高唐也桑氏所言蓋津流出次于
所閒也俗以是水承於河亦謂之源河矣

禹貢雖指曰源

河乃漯之再出者桑欽惟知出此而不知起東武陽則疎矣河既與漯合復分為二漯由漯陰縣故城北河由平原縣故城東蓋自高唐以西至武陽河在南而漯在北自高唐以東至海則漯在南而河在北矣今禹城縣南有源陽故城唐縣則源河之北故名一清按上條經云又有漯水出焉鄜以東武陽隸之而漢志則引桑欽之語以為漯出高唐後人猶指水經為桑欽作豈其然乎
漯水又東北逕

援

一清按漢志作瑗

縣故城西王莽之東順亭也杜預釋地

曰濟南祝阿縣西北有援城漯水又逕高唐縣故城

東昔齊威王使盼子守高唐趙人不敢漁于河即魯

仲連子謂田巴曰今楚軍南陽趙伐高唐者也春秋

左傳哀公十年趙鞅帥師伐齊取黎及轅毀高唐之

郭杜預曰轅即援也祝阿縣西北有高唐城漯水又

東北逕漯陰縣故城北縣故黎邑也

一清按春秋漢傳注作犂丘

武帝元光三年封匈奴降王昆邪為侯國王莽更名

翼城歷北潞陰城南伏琛謂之潞陽城

一清按是注可與下經注

相參南有魏沅州刺史劉岱碑地理風俗記曰平原

潞陰縣今巨潞亭是也潞水又東北逕著縣故城南

一清按漢志濟南郡著縣師古曰音竹庶反又音直庶反而韋昭誤以蒼龜之蒼字乃音紀否反失之遠

矣又東北逕崔氏城北春秋左傳襄公二十七年崔

成請老崔氏者也杜預釋地曰濟南東朝陽縣西北

有崔氏城潞水東北逕東朝陽縣故城南漢高帝六

年沈氏曰本表是七年封都尉華寄為侯國地理風俗記曰南

陽有朝陽縣故加東地理志曰王莽之修治也

一清按漢

志濟南郡朝陽縣應劭曰在朝水之陽至續志始加東字後漢書耿弇傳云從南陽橋濟河以渡章懷注曰朝陽縣名屬濟南郡在朝水之陽城在濟北北有漯河在今濟州臨濟縣東亦見濟水篇注

漯水

又東逕漢徵君伏生墓南碑碣尚存以明經為秦博

士秦坑儒士伏生隱焉漢興教于齊魯之間文帝撰

五經尚書大傳安車徵之年老不行乃使掌故歐陽

生等受尚書於徵君號曰伏生者也漯水又東逕鄒

平縣故城北古鄒侯國舜後姚姓也又東北逕東鄒

城北地理志曰千乘郡有東鄒縣漯水又東北逕建

信縣故城北漢高帝七年封婁敬為侯國應劭曰臨

沛縣西北五十里有建信侯城都尉治故城者也全氏

曰婁敬以闕內侯號建信耳是虛名非實國也故史

漢表中俱不列敬封爵而地志亦不稱建信縣為侯

國然應劭載有建信侯城之名則又何居考漢家闕

內侯之制不得稱國而未嘗不有食邑蓋敬所食邑

在建信故以名其城焉漯水又東北逕千乘縣二城間漢高帝

六年以為千乘郡王莽之建信也章帝建初四年為

王國和帝永元七年改為樂安郡故齊地伏琛曰千

乘城在齊城西北一百五十里隔會水即漂水之別

名也又東北為馬常坑

一清按馬常坑即馬車瀆見淄水注

坑東西八

十里南北三十里亂河枝流而入于海河海之饒茲

馬為最地理風俗記曰漂水東北至千乘入海河盛

則通津委海水耗則微涓絕流書浮于濟漂亦是水

者也

禹貢錐指曰此自西漢末以迄後魏漂川之源委也

又東北過楊虛縣東商河出焉

地理志曰楊虛平原之隸縣也

一清按漢志平原郡有樓虛無楊虛齊氏

曰樓乃楊之謫當以水經注正之然功臣表元帝封樓虛侯訾順而范史馬武亦封楊虛侯續志無樓虛并無楊虛似是明章以後所省樓虛楊虛二名並見漢封抑或原是楊虛後改樓虛東京始建旋復故稱殆乎廢并杳爾無聞如以為誤殆不然矣漢景帝四年以封齊悼惠王子

將廬為侯國也

一清按景帝漢表皆作文帝又將廬漢表作將閭注從史表

城在

高唐城之西南經次于此是不比也商河首受河水亦漯水及澤水所潭也淵而不流世謂之清水自此雖沙漲填塞厥迹尚存歷澤而北俗謂之落里坑逕張公城西又北重源潛發亦曰小漳河商漳聲相近

故字與讀移耳

一清按元和郡縣志云漢鴻嘉四年河水泛溢河隄都尉許商鑿此河通

海故以商為名禹貢錐指曰商河行大河之南漯水之北故次于四瀆津之下高唐漯水之上緣道元有

不比之糾也

商河又北逕平原縣東又逕安惠縣故城南

又東北逕平昌縣故城南又東逕般縣故城南又東

逕樂陵縣故城南漢宣帝地節四年封侍中史子長

為侯國

全氏曰按褚表史子長名高

商河又東逕初鄉縣故城南

高后八年封齊悼惠王子劉辟光為侯國也

沈氏曰按本表

是文帝四年封

王莽更之曰張鄉也應劭曰般縣東南六十

里有枋鄉城故縣也沙溝水注之水南出大河之陽
泉源之不合河者二百步其水北流注商河商河又
東北流逕馬嶺城西北南流屈而東注南轉逕城東

城在河曲之中東海王越斬汲桑於是城

全氏曰此語出晉書

然其實是并州乞活之田甄田蘭所斬非越也

商河又東北逕富平縣故城

北地理志曰侯國也王莽曰樂安亭應劭曰明帝更名關駟曰厭次縣本富平侯車騎將軍張安世之封邑非也按漢書昭帝元鳳六年封右將軍張安世為

富平侯薨子延壽嗣國在陳留別邑在魏郡陳留別邑在魏郡陳留風俗傳曰陳留尉氏縣安陵鄉故富平縣也是乃安世所食矣歲入租千餘萬延壽自以身無功德何堪久居先人大國上書請減戶天子以為有讓徙封平原并食一邑戶口如故而稅減半十三州志曰明帝永平五年改曰厭次矣按史記高祖功臣侯者年表高帝六年封元頃為侯國徐廣音義曰漢書作爰類

全氏曰九字注中注

是知厭次舊名非始明帝

盖復故耳

一清按小司馬云漢志闕盖疎忽之甚耳

縣西有東方朔冢

側有祠祠有神驗水側有雲城漢武帝元封四年封

齊孝王子劉信為侯國也

一清按索隱曰志屬瑯琊又史表是元封漢表是元

朔
商河又分為二水南水謂之長蘆溝東流傾注於

海

一清按郡國志平原郡禹縣劉昭補注引魏都賦曰縣有盖節淵豈即長蘆溝乎

溝南海

側有蒲臺臺高八丈方二百步三齊略記曰禹城東

南有蒲臺秦始皇東遊海上於臺下蟠蒲繫馬至今

歲蒲生縈委若有繫狀似水楊可以為箭今東去海

三十里北水世又謂之百薄瀆東北流注于海水矣

一清按全氏校本於此注下增又東北過高唐縣東經文一條予謂非也上文注云城在高唐城之西南經次于此是不比也則經文揚虛宜在高唐之前矣而下文大河又東北逕高唐縣故城西當直接前潔水入海之下緣經之誤文義遂乖隔爾大河又東北逕高唐縣故城西

春秋左傳襄公十九年齊靈公廢太子光而立公子牙以夙沙衛為少傅齊侯卒崔杼逆光光立殺公子牙於句瀆之邱衛奔高唐以叛京相璠曰本平原縣也齊之西鄙也大河逕其西而不出其東經言出東

誤耳大河又北逕張公城臨側河湄魏青州刺史張

一清按張下失其名魏青州後魏之東青州也魏書
地形志東平原郡梁鄒領平原馬臨濟荏平廣宗高

唐六縣屬齊州不屬青州隋書地理志平原郡平原
縣下云後魏置東青州未久而廢史記正義曰德州

平原縣六十里有張公故城水東有津焉俗名張公
津恐此平原郡古津也魏書張彞傳曾祖幸位青州

刺史祖準之又為東青州刺史東青州暫置旋廢未
必更有一張姓者蓋其土或即是彞之祖未可知也

以彞貴重故 治此故世謂之張公城水有津焉名之
稱張公云

曰張公渡河水又北逕平原縣故城東地理風俗記

曰原博平也故曰平原矣縣故平原郡治矣漢高帝

六年置王莽改曰河平也晉灼曰齊西有平原河水東北過高唐高唐即平原也故經言河水逕高唐縣東非也按地理志曰高唐漯水所出平原則篤馬河導焉明平原非高唐大河不得出其東審矣大河右溢世謂之甘棗溝水側多棗故俗取名焉河盛則委泛水耗則輟流故瀆又東北歷長隄逕漯陰縣北東逕著城北東為陂淀淵潭相接世謂之穢野薄河水又東北逕陽阿縣故城西漢高帝六年封郎中萬訢

為侯國應劭曰涿陰縣東南五十里有陽阿鄉故縣

也一清按漢志上黨郡有陽阿縣非河水逕流之地
平原郡有阿陽縣與涿陰縣相近萬訢史漢表皆
無其姓名表有陽河齊侯其石索隱曰縣名屬上黨
是知河字誤也當作陽阿陽阿與阿陽其文互易因
致混淆漢書孝成皇后傳云屬陽阿主家師古曰陽
阿平原之縣也今俗書阿字為河字又或為河陽皆
後人所妄改耳方輿紀要濟南府臨邑下云著城在
縣東南五十里秦縣漢書灌嬰收著涿陰平原馬廬
此即著也涿陰城在縣西十里本齊之犁丘邑阿陽
城在縣南漢縣屬平原郡後漢省太平寰宇記云阿
陽城在禹城縣南七十里漢魏以下却改為陽阿然
則阿陽之在平原審矣酈氏既誤記陽阿為訢封邑
而沁水篇注陽阿縣下又引卞訢為證一事兩隸書
成一手隔越不過數卷猶有斯繆信乎撰述之難也

已又按訢封邑宜為阿陽非上黨之陽阿陽阿齊侯其石封邑也然訢名不見於史漢表則以世本漢書多脫失是以班固云高祖百四十七人今實數之得百三十三人耳訢亦在失亡之中矣不然道元既記于此而又筆之沁水篇豈真鑿孔造作耶但此篇作萬訢沁水篇又作卞訢萬古省作万與卞字相似不妨兩存其疑義耳

又東北過潞陽縣北

河水自平原左逕安息城東而北為鹿角津東北逕般縣樂陵柵鄉厭次縣故城南為厭次河漢安帝永初二年劇賊畢豪等數百乘船寇平原縣令劉雄門

下小吏所輔浮舟追至厭次津與賊合戰並為賊擒

輔求代雄豪縱雄於此津輔

一清按輔下有脫文范史劉茂傳豪縱雄而刺

輔貫心洞背即死道元不應沒其大節也

可謂孝盡愛敬義極君臣矣河

水右逕漂陰縣故城北王莽之臣武縣也

一清按此北漂陰也

伏琛之所謂漂陽城者也今本漢書脫去漂陽縣故并王莽所改臣武之名亦失之又臣武孫潛夫校本作巨武巨字是也前北漂陰注引地理風俗記云今巨漂亭漂水即武水故新莽有巨武之稱

河水

又東北為漂沃津在漂沃縣故城南王莽之延亭者

也地理風俗記曰千乘縣西北五十里有大河河北

有漯沃城故縣也魏改為後部亭今俗遂名之曰右
輔城河水又東逕千乘縣故城北伏琛之所謂千乘
北城者也

又東北過利縣北

一清按漢志齊郡利縣續志樂安國利故屬齊

又東北過

甲下邑濟水從西來注之又東北入于海

河水又東分為二水枝津東逕甲下城南東南歷馬
常坑注濟經言濟水注河非也河水自枝津東北流
逕甲下邑北世謂之倉子城又東北流入于海淮南

子曰九折注於海而流不絕者崑崙之輸也尚書禹
貢曰夾石碣石入于河山海經曰碣石之山繩水出
焉東流注于河河之入海舊在碣石今川流所導非
禹瀆也周定王五年河徙故瀆故班固曰商竭周移
也又以漢武帝元光二年河徙東郡更注勃海是以

漢司空掾王璜

一清按漢書儒林傳琅邪王橫平仲傳古文尚書溝洫志亦作王橫

言

曰往者天嘗連雨東北風海水溢西南出寔數百里

故張君云

禹貢雖指曰後漢志注禹貢正義並引張氏地理志張氏不知其名豈即所稱張君

耶程大昌以為張揖按隋書經籍志有魏博士張揖撰廣雅二卷而無張氏地理志未審張君是揖否

碣石在海中盖淪于海水也

禹貢錐指曰按道元卒于魏孝昌二年歲在丙

午下距齊文宣登碣石之歲天保四年癸酉凡二十年而文宣所登乃在營州前此未聞營州有碣石疑是時平州之碣石已亡故假營州臨海之一山登之以修故事不然豈有舍此登彼之理自是以後登碣石者無聞焉妄意推測碣石之亡當在魏齊之世丙午至癸酉二十八年間也昔燕齊遼

曠分置營州今城屆海濱海水北侵城垂淪者半王

璜之言信而有徵碣石入海非無證矣

禹貢錐指曰薛氏曰河入

海處舊在平州石城縣東望碣石其後大風逆河皆漸于海舊道湮矣又曰王橫曰往者天嘗連雨東北

風海水溢西南出窾數百里九河之地已為海所漸矣九河但堙塞耳而橫云為海所漸世莫不痛詆之百詩獨為余言曰九河若作逆河則未為不是余頷之而未以見其誠然及讀薛氏語始知古人先得我心又曰九河之地為海所漸王橫之言誠誤若程大昌云鄭道元亦謂九河淪於海則善長實未之有也按鄭氏三言碣石淪于海中而九河不從橫說第五卷河水注云自禹殷東光河間樂成以東城地並存川瀆多亡第十卷漳水注云九河既播八枝代絕遺跡故稱往往時存此與許商鄭康成所言如出一口而程氏與碣石連舉遂使鄭亭負此長窾吁可怪也一清按鄭注引王橫之言以證碣石淪海而九河為海之所漸等語槩從刪削卓見特識得東樵為之闡明善哉言乎薛氏名季宣字士龍永嘉人宋史儒林傳焦氏經籍志書古文訓十六卷薛季宣撰著

水經注釋卷五

欽定四庫全書

史部

水經注釋卷六至八

詳校官監察御史臣周元良

刑部郎中臣許兆椿覆勘

總校官降調編修臣倉聖琳

校對官編修臣邱庭澂

騰錄監生臣董鏞

欽定四庫全書

水經注釋卷六

仁和趙一清撰

汾水

澮水

涑水

文水

原公水

洞渦水

晉水

湛水

汾水出太原汾陽縣北管涔山

山海經曰北次二經之首在河之東其東首枕分其名曰管涔之山其上無木而多草其下多玉汾水出

馬而西流注于河十三州志曰出武州之燕京山亦
管涔之異名也其山重阜修巘有草無木泉源導於
南麓之下盖稚水蒙流耳又西南夾岸連山聯峯接
勢劉淵族子曜嘗隱居於管涔之山夜中忽有二童
子入跪曰管涔王使小臣奉謁趙皇帝獻劍一口置
前再拜而去以燭視之劍長二尺光澤非常背有銘
曰神劍服御除衆毒曜嘗服之劍隨時變為五色也
後曜遂為胡王矣汾水又南與東西温谿合水出左

右近谿聲流翼注水上雜樹交蔭雲垂煙接自是水
流潭漲波襄轉泛又南逕一城東憑墉積石側枕汾
水俗謂之代城又南出二城間其城角倚翼枕汾流
世謂之侯莫干城蓋語出戎方傳呼失實也汾水又
南逕汾陽縣故城東川土寬平峘山夷水故地理志
曰汾水出汾陽縣北山西南流者也漢高帝十一年
封靳彊為侯國後立屯農積粟在斯謂之羊腸倉山
有羊腸坂在晉陽西北石磴縈委若羊腸焉故倉坂

取名矣漢永平中治呼沱石白河按司馬彪後漢郡

國志常山南行唐縣有石白谷

一清按十九字注中注寰宇記平山縣下

云隋圖經房山瀝水出馬亦謂之石白河又謂之行唐水出行唐東入博陵謂之木刀溝一謂之架漿水

南流入滹沱瀝水一見於清水篇曰瀝邑是也再益見於濁漳水篇曰瀝口是也皆是水流逕通者也

咨乘未氏謀埠箋曰御覽作資承

呼沱之水轉山東之漕自都盧

至羊腸倉將憑汾水以漕太原

一清按古今注曰永平十年作常山呼沱

河蒲吾渠通漕船也此即所謂轉山東漕之道也

用實秦晉苦役連年轉運

所經凡三百八十九隘死者無算拜鄧訓為謁者監

護水功訓隱括知其難立具言肅宗肅宗從之全活
數千人和熹鄧后之立叔父陔以為訓積善所致也
羊腸即此倉也又南逕秀容城東魏土地記曰秀容
胡人徙居之立秀容護軍治東去汾水六十里南與
酸水合水源西出少陽之山東南流注于汾水汾水
又南出山東南流洛陰水注之水出新興郡西流逕
洛陰城北又西逕孟縣故城南春秋左傳昭公二十
八年分祁氏七縣為大夫之邑以孟丙為孟大夫
顧炎

武左傳杜解補正云孟丙為孟大夫今本作孟丙者非漢書地理志云孟晉大夫孟丙邑以其為孟大夫而謂之孟丙猶魏大夫之為魏壽餘闔大夫之為闔嘉邯鄲大夫之為邯鄲午也

洛陰水又

西逕狼孟縣故城南王莽之狼調也左右夾澗幽深

南面大壑俗謂之狼馬澗舊斷澗為城有南北門

闔故壁尚在洛陰水又西南逕陽曲城北魏土地記

曰陽曲胡寄居太原界置陽曲護軍治其水西南流

注于汾水分水又南逕陽曲城西南注也

一清按漢志太原郡

陽曲縣應劭曰河千里一曲當其陽故曰陽曲也

東南過晉陽縣東晉水從縣東南流注之

太原郡治晉陽城秦昭襄王三年立尚書所謂既修
太原者也春秋說題辭曰高平曰太原原端也平而
有度廣疋曰大鹵太原也釋名曰地不生物曰鹵盧
穀梁傳曰中國曰太原夷狄曰大鹵尚書大傳曰東
原底平大而高平者謂之太原郡取稱焉魏土地記
曰城東有汾水南流水東有晉使持節都督并州諸
軍事鎮北將軍太原成王之碑水上舊有梁清泝殞

於梁下豫讓死於津側亦襄子解衣之所在也汾水
西逕晉陽城南舊有介子推祠祠前有碑廟宇傾頽
唯單碑獨存矣今文字剝落無可尋也

又南洞渦水從東來注之

汾水又南逕梗陽縣故城東故榆次之梗陽鄉也魏
獻子以邑大夫魏戊也京相璠曰梗陽晉邑也今太

原晉陽縣南六十里榆次界有梗陽城

名勝志清源縣下引水經

注云汾水又南逕梗陽縣故城東有白石水中隱水俱來注之今本無之汾水又南即洞

渦水會者也

又南過大陵縣東

昔趙武靈王遊大陵夢處女鼓琴而歌想見其人吳
廣進孟姚馬即於此縣也王莽改曰大寧矣汾水於
縣左迤為鄔澤廣雅曰水自汾出為汾陂其陂東西
四里南北一十餘里陂南接鄔地理志曰九澤在北
并州藪也呂氏春秋謂之大陸又名之曰漚漢之澤
俗謂之鄔城許慎說文曰馮水出西河中陽縣北沙

南入河即此水也

禹貢錐指曰冀州有三大陸一在鉅鹿郡北班固繫諸禹貢又名鉅

鹿澤呂氏春秋云趙有鉅鹿又名廣河澤爾雅晉有大鹿孫炎曰今鉅鹿縣廣河澤是也此真禹貢之大陸也一在河內修武縣左傳定公元年魏獻子田于大陸還卒于寧杜預曰大陸疑即吳澤陂近寧是也一在太原鄆縣班固云九澤在縣北是為昭餘祁并州數鄆道元云呂氏春秋謂之大陸是也斯二者皆非禹貢之大陸也今按呂覽九數既云晉之大陸又云趙之鉅鹿則一澤不應兩見故道元以鄆澤當之蓋晉為唐叔始封大陸宜在其境內而鉅鹿當戰國時實為趙地故分為二澤也要之廣平曰陸是處有之其大者則謂之大陸猶之高平曰原亦是處有之陸恐陵之誤全氏曰昭餘祁是鄆水為而為馮水馮鳥字之變也是為并州數若并州之川曰漚洩則漚

也呂覽以二者合而為一善長于滌水明指為滌水矣而鄔水又溷引之蓋失檢也馮水又會

嬰侯之水山海經稱謁戾之山嬰侯之水出于其陰
北流注于汜水右出汜山其水殊源共合注于嬰侯
之水亂流逕中都縣南俗又謂之中都水侯甲水注
之水發源祁縣胡甲山有長坂謂之胡甲嶺即劉歆
遂初賦所謂越侯甲而長驅者也蔡邕曰侯甲亦邑
名也在祁縣侯甲水又西北歷宜歲郊逕太谷謂之
太谷水出谷西北流逕祁縣故城南自縣連延西接

鄔澤是為祁藪也即爾雅所謂昭餘祈矣賈辛邑也

辛貌醜妻不為言與之如皋射雉雙中之則笑也

朱氏

謀埤笈曰據左傳貌醜者自是賈大夫非賈辛也

王莽之永縣也又西逕京

陵縣故城北王莽更名之曰致城矣於春秋為九原

之地也故國語曰趙文子與叔向遊於九原曰死者

若可作也吾誰與歸叔向曰其陽子乎文子曰夫陽

子行廉直於晉國不免其身智不足稱吾其隨會乎

納諫不忘其師矣其京尚存漢興增陵於其下故曰

京陵馬方輿紀要平陶城後魏改曰平遙避太武嬪名水經注西胡內侵徙居京陵今本無之

侯甲水又西北逕中都縣故城南城臨際水湄春秋

昭公二年晉侯執陳無宇於中都者也漢文帝為代

王都此武帝元封四年上幸中都宮殿上見光赦中

都死罪以下侯甲水又西北於嬰侯之水逕鄆縣故

城南晉大夫司馬彌牟之邑也謂之鄆水也俗亦曰

慮水慮鄆聲相近故因變焉又西北入鄆陂而歸于

汾流矣

又南過平陶縣東文水從西來流注之

汾水又南與石桐水合即綿水也水出界休縣之綿山北流逕石桐寺西即介子推之祠也昔子推逃晉文公之賞而隱於綿上之山也晉文公求之不得乃封綿為介子推田曰以志吾過且旌善人因名斯山為介山故袁山松郡國志曰界休縣有介山有綿上聚子推廟王肅喪服要記曰昔魯哀公祖載其父孔子曰寧設桂樹乎哀公曰不也桂樹者起於介子推

子推晉之人也文公有內難出國之狄子推隨其行
割肉以續軍糧後文公復國忽忘子推子推奉唱而
歌文公始悟當受爵祿子推奔介山抱木而燒死國
人葬之恐其神魂賈于地故作桂樹焉吾父生於宮
殿死於枕席何用桂樹為余按夫子尚非璵璠送葬
安能問桂樹為禮乎王肅此證近於誣矣石桐水又
西流注于汾水汾水又西南逕界休縣故城西王莽
更名之曰界美矣城東有徵士郭林宗宋子浚二碑

宋冲以有道司徒徵林宗縣人也辟司徒舉太尉以疾辭其碑文云將蹈洪崖之遐迹紹巢由之逸軌翔區外以舒翼超天路以高峙稟命不融享年四十有

三建寧四年正月丁亥

一清按漢隸字源載此碑作乙亥文選同後漢書靈帝紀

建寧四年正月甲子是

有乙亥無丁亥注文誤 卒凡我四方同好之人永懷

哀痛乃樹碑表墓昭銘景行云陳留蔡伯喈范陽盧子幹扶風馬日磾等遠來奔喪持朋友服心喪期年者如韓子助宋子浚等二十四人其餘門人著錫衰

者千數其碑文故蔡伯喈謂盧子幹馬日碑曰吾為
天下碑文多矣皆有慚容惟郭有道無愧於色矣汾
水之右有左部城側臨汾水蓋劉淵為晉都尉所築
也

又南過冠爵津

汾津名也在界休縣之西南俗謂之雀鼠谷數十里
閒道隘水左右悉結偏梁閣道累石就路縈帶巖側
或去水一丈或高五六尺上戴山阜下臨絕澗俗謂

之為魯般橋蓋通古之津隘矣亦在今之地嶮也

太平

寰宇記靈石縣下引水經云汾水又南過冠爵津與桐水合注云汾水關名也在崔谷一名崔津俗謂之崔鼠谷校勘云按今水經及注與此皆少異大抵今記所引古書但取其意而增損其文務要通俗不與古書合又寰宇記洪洞縣下引水經云霍山北有崔鼠谷谷中道險左右悉結成偏梁累石就路俗謂之魯般橋與今文差近也

又南入河東界又南過永安縣西

故虢縣也周厲王流于虢即此城也王莽更名黃城漢順帝陽嘉三年改曰永安縣霍伯之都也歷唐城

東瓚注漢書云堯所都也東去瓚十里汾水又東與
瓚水合水出東北太岳山禹貢所謂岳陽也即霍太
山矣上有飛廉墓飛廉以善走事紂惡來以多力見
知周王伐紂兼殺惡來飛廉先為紂使北方還無所
報乃壇於霍太山而致命焉得石棺銘曰帝令處父
不與殷亂賜汝石棺以葬死遂以葬焉霍太山有岳
廟廟甚靈烏雀不棲其林猛虎常守其庭又有靈泉
以供祭祀鼓動則泉流聲絕則水竭相東陰山縣有

侯曇山上有靈壇壇前有石井深數尺居常無水及臨祈禱則甘泉湧出周用則已亦其比也羸水又西流逕觀阜北故百邑也原過之從襄子也受竹書於王澤以告襄子襄子齋三日親自剖竹有朱書曰余霍太山山陽侯天使也三月丙戌余將使汝反滅智氏汝亦立我於百邑也襄子拜受三神之命遂滅智氏祠三神於百邑使原過主之世謂其處為觀阜也羸水又西流逕永安縣故城南西南流注于汾水汾

水又南逕霍城東故霍國也昔晉獻公滅霍趙夙為

御霍公求奔齊晉國大旱卜之曰霍太山為祟使趙

夙召霍君奉祀晉復穰也蓋霍公求之故居也汾水

又逕趙城西南穆王以封造父趙氏自此始也汾水

又南霍水入焉水出霍太山發源成潭漲七十步而

不測其深西南逕趙城南西流注于汾水

太平寰宇記洪洞縣

下引水經云霍水出趙城縣東三十八里廣勝寺大郎神西流至洪洞縣界與今本異

又南過楊縣東

澗水東出穀遠縣西山西南逕楊縣霍山南又西逕
楊縣故城北晉大夫僚安之邑也應劭曰故楊侯國
王莽更名有年亭也其水西流入于汾水汾水逕楊
城西不於東矣魏土地記曰平陽郡治楊縣郡西有
汾水南流者是也

西南過高梁邑西

黑水出黑山西逕楊城南又西與巢山水會山海經
曰牛首之山勞水出焉西流注于滴水疑是水也滴

水即巢山之水也水源東南出巢山東谷北逕浮山東又西北流與勞水合亂流西北逕高梁城北西流入于汾水又南逕高梁故城北故高梁之墟也春秋僖公二十四年秦穆公納公子重耳於晉害懷公於此竹書紀年晉出公十三年智伯瑤城高梁漢高帝十二年以為侯國封恭侯酈疥於斯邑也

又南過平陽縣東

汾水又南逕白馬城西魏刑白馬而築之故世謂之

白馬城今平陽郡治汾水又南逕平陽縣故城東晉大夫趙鼎之故邑也應劭曰縣在平河之陽堯舜並都之也竹書紀年晉烈公元年韓武子都平陽漢初曹參擊魏王豹走之盡有魏地後封列侯食邑平陽固斯境矣昭帝封度遼將軍范明友為侯國王莽之香平也晉立平陽郡治此矣

一清按三國志魏書三少帝紀齊王芳正始八

年夏五月分河東之汾北十縣為平陽郡非始于晉也

水側有堯廟廟前有碑

魏土地記曰平陽城東十里汾水東原上有小臺臺

上有堯神屋石碑永嘉三年劉淵徙平陽於汾水得
白玉印方四寸高二寸二分龍紐其文曰有新寶之
印王莽所造也淵以為天授改永鳳二年為河瑞元
年汾水南與平水合水出平陽西壺口山尚書所謂

壺口治梁及岐也

禹貢錐指曰冀州有三壺口一在吉州西南禹貢之壺口也一為汾

陰縣西南之平山平水所出亦名壺口山又名姑射山鄆道元謬以為尚書之壺口一在長治縣東南左傳哀公四年齊國夏伐晉取壺口杜注潞縣東有壺口闕路縣即今潞城縣闕以山名此二山皆非禹貢之壺口也又曰壺口山漢志在北屈縣東南括地志云在吉昌縣西南五十里吉昌今吉州也後魏延興

四年於此置定陽郡及縣元和志云北屈故縣在定陽郡北二十里今州直北之地山當在其西南漢志云東南其水東逕孤谷亭北春秋時狄侵晉取孤厨誤也

者也又東逕平陽城南東入汾俗以為晉水非也汾水又南歷襄陵縣故城西晉大夫卻犇之邑也故其地有犇氏鄉亭矣西北有晉襄公陵縣蓋即陵以命氏也王莽更名曰幹昌也

又南過臨汾縣東

天井水出東陘山西南北有長嶺嶺上東西有通道

即鉏陞也穆天子傳曰乙酉天子西絕鉏陞西南至
監是也其水三泉竒發西北流總成一川西逕堯城
南又西南流入汾

又屈從縣南西流

汾水又逕絳縣故城北竹書紀年梁惠成王二十五
年絳中地塉西絕於汾汾水西逕虎祁宮北橫水有
故梁截汾水中凡有三十柱柱徑五尺裁與水平蓋
晉平公之故梁也物在水故能持久而不敗也又西

選魏正平郡南故東雍州治太和中皇都徙洛罷州
立郡矣又西選王橋澮水入焉

又西過長脩縣南

汾水又西與古水合水出臨汾縣故城西黃阜下其
大若輪西南流故溝橫出焉東注于汾今無水又西
南選魏正平郡北又西選荀城東古荀國也汲郡古
文晉武公滅荀以賜大夫原氏黯是為荀叔也古水
又西南入于汾汾水又西南選長修縣故城南漢高

帝十一年以為侯國封杜恬

一清按史表曰
一云杜恪也

有修水

出縣南而西南流入汾汾水又西逕清原城北故清

陽亭也城北有清原晉侯蒐清原作三軍處也汾水

又逕冀亭南昔白季使過冀野見郤缺耨其妻饁之

相敬如賓言之文公文公命之為卿復與之冀京相

璠曰今河東皮氏縣有冀亭古之冀國所都也杜預

釋地曰平陽皮氏縣東北有冀亭即此亭也汾水又

西與華水合水出北山華谷西南流逕一故城西俗

謂之梗陽城非也梗陽在榆次非在此案故漢上谷
長史侯相碑云侯氏出自倉頡之後踰殷歷周各以
氏分或著楚魏或顯齊秦晉卿士薦斯其裔也食采
華陽今蒲坂北亭地即是城也其水西南流注于汾
汾水又逕稷山北在水南四十許里山東西二十里
南北三十里高十三里西去介山一十五里山上有
稷祠山下稷亭春秋宣公十五年秦穆公治兵于稷
以畧狄土

朱氏謀埒箋曰孫汝澄云按左傳秦桓公伐晉晉侯治兵于稷以畧狄土是也

又西過皮氏縣南

汾水西逕鄴邱北故漢氏之方澤也賈逵云漢法三年祭地汾陰方澤澤中有方邱故謂之方澤邱即鄴邱也許慎說文稱從邑癸聲河東臨汾地名矣在介山北山即汾山也其山特立周七十里高三十里文穎言在皮氏縣東南側可三十里乃非也今準此山可高十餘里山上有神廟廟側有靈泉祈祭之日周而不耗世亦謂之子推祠揚雄河東賦曰靈輿安步

周流容與以覽于介山嗟文公而愍推兮勤大禹于
龍門晉太康記及地道記與永初記並言子推所逃
隱於是山即實非也余按介推所隱者綿山也文公
環而封之為介推田號其山為介山杜預曰在西河
界休縣者是也汾水又西逕耿鄉城北故殷都也帝
祖乙自相徙此為河所毀故書叙曰祖乙圮于耿杜
預曰平陽皮氏縣東南耿鄉是也盤庚以耿在河北
迫近山川乃自耿遷亳後晉獻公滅之以封趙夙

清一

按此注語有病漢志云耿鄉故耿國晉
獻公滅之以賜大夫趙夙斯為無弊也後襄子與韓

魏分晉韓康子居平陽魏桓子都安邑號為三晉此
其一也漢武帝行幸河東濟汾河作秋風辭於斯水
之上汾水又西逕皮氏縣南竹書紀年魏襄王十二
年秦公孫爰率師伐我圍皮氏翟章率師救皮氏圍
疾西風十三年城皮氏者也漢河東太守番係穿渠
引汾水以溉皮氏縣故渠尚存今無水

又西至汾陰縣北西注于河

水南有長阜背汾帶河阜長四五里廣二里餘高十丈汾水歷其陰西入河漢書謂之汾陰睢應劭曰睢邱類也汾陰男子公孫祥望氣寶物之精上見祥言之于武帝武帝于水獲寶鼎焉遷于甘泉宮改其年

曰元鼎即此處也

沈氏曰望氣者汾陰男子公孫滂洋上遂立后土祠于汾陰睢見漢

書却祀志得鼎者汾陰巫錦上遂改元見史記封禪書自是二事且公孫滂洋非祥也得鼎于地非水也

澮水出河東絳縣東澮交東高山

澮水東出絳高山亦曰河南山又曰澮山西逕翼城

南按詩譜言晉穆侯遷都于絳暨孫孝侯改絳為翼
翼為晉之舊都也後獻公又北廣其城方二里又命
之為絳故司馬遷史記年表稱獻公九年始城絳都
左傳莊公二十六年晉士蒍城絳以深其宮是也其
水又西南合黑水水導源東北黑水谷西南流逕翼
城北右引北川水出平川南流注之亂流西南入澮
水澮水又西南與諸水合謂之澮交竹書紀年曰莊
伯十二年翼侯焚曲沃之禾而還作

一清按作
字疑誤 為文

公也又有賀水東出近川西南至澮交入澮又有高
泉水出東南近川西北趣澮交注澮又南紫谷水東
出白馬山白馬川遁甲開山圖曰絳山東距白馬山
謂是山也西逕熒庭城南而西出紫谷與乾河合即
教水之枝川也史記白起傳稱起涉河取韓安邑東
至乾河是也其水西與田川水合水出東谿西北至
澮交入澮又有女家水出于家谷竹書紀年曰莊伯
以曲沃叛伐翼公子萬救翼荀叔軫追之至于家谷

有范辟水出于辟下並西北流至翼廣城昔晉軍北

入翼廣以築之因即其姓以名之二水合而為

全氏曰此

處有脫文

西北流至澮交入澮澮水又西南與絳水合俗

謂之白水非也水出絳山東南寒泉奮湧揚波北注

懸流奔壑一十許丈青崖若點黛素湍如委練望之

極為竒觀矣其水西北流注于澮應劭曰絳水出絳

縣西南蓋以故絳為言也史記稱智伯率韓魏引水

灌晉陽不沒者三版智氏曰吾始不知水可以亡人

國今乃知之汾水可以浸平陽絳水可以浸安邑時
韓居平陽魏居安邑魏桓子肘韓康子韓康子履魏
桓子肘足接於車上而智氏以亡魯定公問一言可
以喪邦有諸孔子以為幾乎余觀智氏之譚矣汾水

灌平陽或亦有之絳水澆安邑未識所由也

資治通鑑周威

烈王紀云以汾水可以灌安邑絳水可以灌平陽也胡氏三省注曰水經注曰絳水出絳縣西南蓋以故絳為言其水出絳山東西北流而合于澮猶在絳縣界中智伯所謂汾水可以灌安邑或亦有之絳水可以灌平陽未識所由余謂自春秋之季至于元魏歷年滋多郡縣之離合山川之遷改有不可以一時所

睹為據者史記正義曰韓初都平陽今晉州也括地志曰絳水一名白水今名沸泉源出絳山可接引灌平陽城廊道元父範歷任三齊少長齊地熟其山川後入關死于道未嘗至河東也此蓋因耳學而致疑括地志成于唐之魏王泰羅致天下一時名儒以作此書其考據宜詳當取以為據一清按梅磻所引鄜注與今本全相乖迥閻百詩潛邱劄記曰汾水可以灌平陽絳水可以澆安邑此亦何須說余嘗往來于平陽夏縣而悟二語具有妙解蓋汾水并可以灌安邑至絳水則又不待言絳水并可以灌平陽至汾水則又不待言交錯互舉摠見水之為害溥爾然梁書韋叡傳却是吾聞汾水可以灌平陽絳水可以灌安邑不如通鑑所云又按顧景范曰括地志亦因舊文強為附會汾水可以灌平陽絳水可以灌安邑舊史云汾水可以灌安邑絳水可以灌平陽乃文互耳又云涑水在蒲州東十里有孟盟橋其上流即絳水自

水經注釋

干

絳縣歷聞喜夏縣安邑猗氏至臨晉縣界合姚暹渠而西出又西南注于大河俗名陽安澗水水經注涑水出雷首山縣北與蒲坂分水是也戰國策絳水可以灌安邑以絳水為涑水蓋合聞喜河北二涑水為一今觀道元注絳水出絳山下流入澮澮入汾汾入河不與涑水合也

西過其縣南

春秋成公元年晉悼公謀去故絳欲居郟瑕魏獻子

曰何氏曰事在成六年非元年晉景公非悼公韓獻子非魏莊子柳子厚晉問魏絳之言曰近實則公

室乃貧自本水經注非不記左氏傳故以示博也土薄水淺不如新田有汾

澮以流其惡遂居新田又謂之絳即絳陽也蓋在絳

澮之陽漢高帝六年封越騎將軍華無害為侯國

林危

曰故絳猶故都故宅耳杜元凱成六年故絳注曰晉復命新田為絳故謂此為故絳杜蓋以新田為新絳也酈氏遂用其說然莊二十六年士蒞城絳杜注曰絳晉所都今平陽絳邑縣而新田注又曰今平陽絳邑縣是夫故絳既絳邑而新田又復同墟杜之釋地殆自相伐且殷人五遷不稱新亳周京屢徙非帶舊幽齊都臨淄便棄薄姑之號楚移湫都豈仍故郢之思則絳本非嘉名不過以水氏縣晉人何所取而三以命都哉又史記越將絳陽侯無害司馬貞考地理志無絳陽而漢表作終陵則史記之絳陽未足以證新田也閻氏若璩曰故絳在太平縣南二十五里絳州之北土人至今呼故晉城新絳去故晉城五十里土人呼為王官城一清按危林之說甚辨然究不能名終陵為何地漢表華無害孫祿失侯其曾孫於陵

大夫告元康四年詔復迺知終陵者於陵
之訛也地理志於陵濟南郡之屬縣也縣南對絳山

面背二水古文瓊語曰晉平公與齊景公乘至于滄

上見乘白驂八駟以來有犬狸身而狐尾隨平公之

車公問師曠對曰首陽之神有犬狸身狐尾其名曰

朱氏謀埠箋曰者飲酒得福則徼之蓋於是水之上
名曰一作逢君

也

又西南過虎和宮南

宮在新田絳縣故城西四十里晉平公之所構也時

有石言於魏榆晉侯以問師曠曠曰石不能言或憑
焉臣聞之作事不時怨讟動于民則有非言之物言
也今宮室崇侈民力雕盡石言不亦宜乎叔向以為
子野之言君子其宮地背汾面澮西則兩川之交會
也竹書紀年曰晉出公五年澮絕于梁即是水也

又西至王橋注于汾水

晉智伯瑤攻趙襄子襄子奔保晉陽原過後至過三
人於此澤自帶以下不見持竹二節與原過曰為我

遺無卹原過受之於是澤所謂王澤也

涑水出河東聞喜縣東山黍葭谷

涑水所出俗謂之華谷

太平寰宇記校勘云涑水出黎葭谷俗謂之葦谷水經涑

水出黍薛谷俗謂之華谷今黍作黎薛作葭華作葦未知孰是一清按校勘不知何人所作其云水經作黎葭為黍薛今本皆作黍葭與校勘所見之本異當作黍葭為是又汾水篇長修縣下注云汾水又西與華水合水出北山華谷蓋其地相連接北史載韋孝寬之守玉壁請于華谷及長秋築城及周武帝東伐趙王招率兵出稽胡敕孝寬為行軍總管圍守華谷以應接之即是谷也至周陽與洮水

合水源東出清野山世人以為清襄山也其水東逕

大嶺下西流出謂之哈口又西合涑水鄭使子產問

晉平公疾平公曰卜云臺台為祟史官莫知敢問子

產曰高辛氏有二子長曰閔伯季曰實沈不相相容

帝遷閔伯於商邱遷實沈於大夏臺台實沈之後全氏

曰按善長于左學甚疎左氏明云實沈出高辛為參神臺台出金天為汾神是二崇也乃云臺台實沈之

後不其能業其官帝用嘉之國于汾川由是觀之臺糾與

台汾洮之神也賈逵曰汾洮二水名司馬彪曰洮水

出聞喜縣故王莽以縣為洮亭也

全氏曰按漢志王莽以左邑為洮亭

不以聞喜下注可
驗蓋善長失檢也
然則涑水殆亦洮水之兼稱乎

又西過周陽邑南

其城南臨涑水北倚山原竹書紀年晉獻公二十五

年正月翟人伐晉周有白兔舞于市即是邑也漢景

帝以封田勝為侯國也

沈氏曰索隱曰在上郡則是陽周之謫善長誤矣全氏曰

按趙兼田勝皆封周陽索隱皆以為陽周然考周陽由以周陽侯受姓則非陽周矣恐是索隱之誤善元所云足以正史表之失也一清按外戚世家索隱曰周陽縣名屬魏郡是又一說也尋地理志無之故不足為據又按趙兼以淮南王舅封而厲王子賜亦封周陽後以侯立為廬江王則其地當在九江廬江境

內而今不
可考矣

涑水西逕董澤南即古池東西四里南北

三里春秋文公六年蒐于董澤即斯澤也

何氏曰左傳作蒐于

董杜元凱注云汾陰縣有董亭宣十二年傳董澤之蒲注云澤名河東聞喜縣東北有董澤陂則文六年

改蒐于董者非董澤也

涑水又與景水合水出景山北谷山海

經曰景山南望鹽販之澤北望少澤其草多藟藟秦

椒其陰多赭其陽多玉郭景純曰鹽販之澤即解縣

鹽池也按經不言有水今有水焉西北流注于涑水

也

又西南過其縣南

涑水又西逕仲邨郭

一清按三字疑有誤趙氏琦美曰小學書無邨字疑是郭字亦

未有據說文高陵有邨徒歷切則邨本地名

北竹書紀年曰翼侯伐曲沃

大捷武公請成于翼至桐廡乃返者也漢書曰漢武

帝元鼎六年將幸緱氏至左邑桐鄉間南越破以為

聞喜縣者也涑水又西與沙渠水合水出東南近川

西北流注于涑水涑水又西南逕左邑縣故城南故

曲沃也晉武公自晉陽徙此

全氏曰按晉穆侯自晉陽徙翼武公自翼徙曲

沃善長
誤矣

秦改為左邑縣詩所謂從子于鵠者也春秋

傳曰下國有宗廟謂之國在絳曰下國矣即新城也

王莽之洮亭也涑水自城西注水流急濬輕津無緩

故詩人以為激揚之水言不能流移東薪耳水側即

狐突遇申生處也春秋傳曰秋狐突適下國遇太子

太子使登僕曰夷吾無禮吾請帝以畀秦對曰神不

歆非類君其圖之君曰諾請七日見我於新城西偏

及期而往見於此處故傳曰鬼神所憑有時而信矣

涑水又西逕王官城北城在南原上春秋左傳成公十三年四月晉侯使呂相絕秦曰康猶不悛入我河曲伐我涑川俘我王官故有河曲之戰是矣今世人猶謂其城曰王城也

又西南過安邑縣西

安邑禹都也禹娶塗山氏女思戀本國築臺以望之今城南門臺基猶存余按禮天子諸侯臺門隅阿相降而已未必一如書傳也故晉邑矣春秋時魏絳自

魏徙此昔文侯縣師經之琴於其門以為言戒也武

侯二年又城安邑蓋增廣之秦始皇使左更白起取

安邑置河東郡王莽改名洮陽全氏曰洮陽當作洮

今本漢志亦誤以莽傳考之則知善長所見之漢書亦已誤矣縣曰河東也有項曼

都學道昇仙忽復還此河東號曰斥仙漢世又有閔

仲叔隱遁市邑罕有知者後以識瞻而去涑水又西

南逕鹽池縣故城一清按後漢書靈帝紀熹平四年遣守宮令之鹽池穿渠為民興利

章懷注曰前漢地理志及續漢郡國志並無鹽池監今蒲州安邑縣西南有鹽池鹽池監即鹽池城也

南有鹽池上承鹽水水出東南薄山西北流逕巫咸

山北地理志曰山在安邑縣南海外西經曰巫咸國

在女丑北右手操青蛇左手操赤蛇在登葆山羣巫

所從上下也大荒西經云大荒之中有靈山巫咸巫即

巫盼巫彭巫姑巫貞巫孔巫抵巫謝巫羅

一清按山海經巫貞

作巫真巫孔作巫禮俗書禮作礼形似孔字然十巫

寰宇記引注文亦作孔字是宋初本已如是矣

從此升降百藥爰在郭景純曰言羣巫上下靈山採

藥往來也蓋神巫所遊故山得其名矣谷口嶺上有

巫咸祠其水又逕安邑故城南又西流注于鹽池地理志曰鹽池在安邑西南許慎謂之鹽監長五十一里廣六里周一百一十四里從鹽省古聲呂忱曰宿沙煮海謂之鹽河東鹽池謂之解鹽今池水東西七十里南北十七里紫色澄渟渾而不流水出石鹽自然印成朝取夕復終無減損唯水暴雨澍甘潦奔決則鹽池用耗故公私共竭水徑防其滛濫故謂之鹽水亦為竭水也故山海經謂之鹽販之澤也澤南面

層山天巘雲秀地谷泉深左右辟立間不容軌謂之

石門路出其中名之曰徑南通上陽北暨鹽澤

一清按解

州有白徑嶺路通陝州大陽津渡志云由檀道山陝徑出白徑嶺趨陝州即石門百梯之險也注所云名

之曰徑者也

池西又有一池謂之女鹽澤東西二十五里

南北二十里在猗氏故城南春秋成公六年晉謀去

故絳大夫曰郟瑕地沃饒近鹽服虔曰土平有漑曰

沃鹽鹽也土人鄉俗引裂沃麻分灌川野畦水耗竭

土自成鹽即所謂鹽醴也而味苦號曰鹽田鹽鹽之

名始資是矣本司鹽都尉治領兵一千餘人守之周穆王漢章帝並幸安邑而觀鹽池故杜預曰猗氏有鹽池後罷尉司分猗氏安邑置縣以守之

又南過解縣東又西南注于張陽池

涑水又西逕猗氏縣故城北春秋文公七年晉敗秦于令狐至于剗首先蔑奔秦士會從之闕駟曰令狐即猗氏也剗首在西三十里縣南對澤即猗頓之故居也孔叢曰猗頓魯之窮士也耕則常饑桑則常寒

聞朱公富往而問術焉朱公告之曰子欲速富當畜
五牾於是乃適西河大畜牛羊于猗氏之南十年之
間其息不可計貲擬王公馳名天下以興富於猗氏
故曰猗頓也涑水又西逕郇城詩云郇伯勞之蓋其
故國也杜元凱春秋釋地云今解縣西北有郇城服
虔曰郇國在解縣東郇瑕氏之墟也余按竹書紀年
云晉惠公十有五年沈氏曰是十四年說見河水篇秦穆公率師送
公子重耳圍令狐桑泉向衰皆降於秦師狐毛與先

軫禦秦至于廬柳

全氏曰狐毛與子犯兄弟並從文公其父突以此死如何反為子圍

禦秦師耶竹書之繆甚矣董熄曰其時晉將為呂卻

乃謂秦穆公使公子繫來

與師言退舍次于郟盟于軍京相璠春秋土地名曰

桑泉血衰並在解東南不言解明不至解可知春秋

之文與竹書不殊今解故城東北二十四里有故城

在猗氏故城西北鄉俗名之為郟城考服虔之說又

與俗符賢于杜氏單文孤證矣涑水又西南逕解縣

故城南春秋晉惠公因秦返國許秦以河外五城內

及解梁即斯城也凍水又西南逕瑕城晉大夫詹嘉

之故邑也

顧氏炎武曰知錄曰昔有二瑕其一左傳成公六年諸大夫皆曰必居郟瑕之地杜

氏曰郟瑕古國名水經注凍水又西南逕瑕城京相璠曰今河東解縣西南五里有故瑕城是也在今之

臨晉縣境其一僖公三十年燭之武見秦伯曰許君魚瑕朝濟而夕設版焉解焦瑕晉河外五城之二邑

文公十二年晉人秦人戰于河曲秦師夜遁復侵晉入瑕解以河曲在河東蒲坂縣南則瑕必在河外十

三年晉侯使詹嘉處瑕以守桃林之塞按漢書地理志湖故曰胡武帝建元年更名湖水經河水又東逕

湖縣故城北古瑕胡二字通用禮記引詩心乎愛矣瑕不謂矣鄭氏注云瑕之言胡也瑕胡音同故記用

其字是瑕轉為胡又改為湖而瑕邑即桃林之塞也今為閭鄉縣治成公十三年代秦成肅公卒于瑕亦

此地也道元以郟瑕之瑕為詹嘉之邑誤矣

春秋僖公三十年秦晉圍鄭

鄭伯使燭之武謂秦穆公曰晉許君魚瑕朝濟而夕

設版者也京相璠曰今河東解縣西南五里有故瑕

城涑水又西南逕張陽城東竹書紀年齊師逐鄭太

子齒奔張城南鄭者也漢書之所謂東張矣高祖二

年曹參假左丞相別與韓信東攻魏將孫林邀

全氏曰史

記無林字軍東張大破之蘇林曰屬河東即斯城也涑水

又西南屬于陂陂分為二城南面兩陂左右澤渚東

陂世謂之晉興澤東西二十五里南北八里南對鹽道山其西則石壁千尋東則礧谿萬仞方嶺雲迴竒峯霞舉孤標秀出罩絡羣山之表翠柏蔭峯清泉灌頂郭景純云世所謂鳶漿也發于上而潛于下矣厥頂方平有良藥神農本草曰地有固活女疎銅芸紫莞之族也是以緇服思玄之士鹿裘念一之夫代往遊馬路出北巘勢多縣絕來往者咸援蘿騰釜尋葛降深於東則連木乃陟百梯方降巖側縻鎖之跡仍

今存焉故亦曰百梯山也水自山北流五里而伏云
潛通澤渚所未詳也西陂即張澤也西北去蒲坂一
十五里東西二十里南北四五里冬夏積水亦時有
盈耗也

文水出大陵縣西山文谷東到其縣屈南到平陶縣東
北東入于汾

文水逕大陵縣故城西

一清按善長不計文水之所出而云逕大陵縣故城西蓋

率筆也太平寰宇記云出交城縣西南文谷大陵縣故城在文水縣北十三里發源此城流入文水縣界

文水縣隋開皇十年置因縣西文水為名而南流有泌水注之水出縣西

南山下武氏穿井給養井至幽深後一朝水溢平地
東南注文水又南逕平陶縣之故城東西逕其城內
南流出郭王莽更曰多穰也文水又南逕縣右會隱
泉口水出謁泉山之上頂俗云暘雨愆時是謁是禱
故山得其名非所詳也其上石崖絕險壁立天固崖
半有一石室去地可五十餘丈爰有層松飾巖列柏
綺望唯西側一處得歷級升陟頂上平地一十許頃

沙門釋僧光表建二剝泉發于兩寺之間東流瀝石
沿注山下又東津渠隱沒而不恆流故有隱泉之名
矣雨澤豐澍則通入文水又南逕茲氏縣故城東為
文湖東西一十五里南北三十里世謂之西河泊在
縣直東一十里湖之西側臨湖又有一城謂之豬城
水澤所聚謂之都亦曰豬蓋即水以名城也文湖又
東逕中陽縣故城東按晉書地道記太康地記西河
有中陽城舊縣也文水又東南流與勝水合水出西

狐岐之山東逕六壁城南魏朝舊置六壁於其下防
離石諸胡因為大鎮太和中罷鎮乃置西河郡焉勝
水又東合陽泉水出西山陽谿東逕六壁城北又東
南流注于勝水勝水又東逕中陽縣故城南又東合
文水文水又東南入于汾水也

原公水出茲氏縣西羊頭山東過其縣北

縣故秦置也漢高帝更封沂陽侯嬰為侯國

全氏曰
沂陽是

夏侯嬰初封而食邑茲氏
非封國也更封是汝陰

王莽之茲同也魏黃初二

年置西河郡西河恭王司馬子盛廟碑文云西河舊

處山林漢末擾攘百姓失所魏興更開疆宇分割太

原四縣以為邦邑

全氏曰西河本漢郡建安之亂空荒其土黃初復立而割太原之地

以隸之考晉志太原郡統縣十三皆漢之舊所少者界休茲氏慮虎三縣碑云分割四縣蓋破三為四也

晉志西河郡統縣四離石隰城中陽界休其三縣又皆是漢西河郡故縣名蓋以此三縣之名加之茲氏

慮虎之地耳

其郡帶山側塞矣王以咸寧四年改命爵土

其年十二月喪國臣大農閻崇離石令宗羣等二百

三十四人刊石立碑以述勲德碑北廟基尚存也清

按此碑文多與史異晉宗室無司馬子盛其人者晉書云西河繆王斌字子政魏中郎武帝受禪封陳王三年改封西河咸寧四年薨其薨年與碑同而改封之歲碑在四年傳在三年傳云字子政碑云子盛傳云謚繆碑云謚恭善長親見其碑或是史誤

又東入于汾

水注文湖不至汾也

一清按原公水即洞渦水篇注之原過水魏書地形志所謂出

原過祠下者也善長蓋失于分疏

洞渦水出沾縣北山

其水西流與南谿水合水出南山西北流注洞渦水

又西北黑水出西山三源合舍同歸一川東流南屈
逕受陽故城東按晉太康地記樂平郡有受陽縣盧
諶征艱賦所謂歷受陽而總轡者也其水西南入洞
渦水又西蒲水南出蒲谷北流注之于洞渦又西與
原過水合近北便水源也水西阜上有原過祠蓋懷
道協靈受書天使憂結宿情傳芳後日棟宇雖淪攢
木猶茂故層甍水取名焉其水南流注于洞渦水也
西過榆次縣南又西到晉陽縣南

榆次縣故涂水鄉晉大夫智徐吾之邑也春秋昭公八年晉侯築虎祁之宮有石言晉之魏榆服虔曰魏晉邑榆州里名也漢書曰榆次十三州志以為涂陽縣矣王莽之太原亭也縣南側水有鑿臺韓魏殺智

伯瑤於其下剝腹絕腸折頭摺頤處也

庖林曰史記智伯醉以酒

灌擊母邨又豫讓傳襄子怨智伯漆其頭以為飲器乃知漆頭之謔實報灌首之辱諸家解同虎子已屬麗言而水經注曰韓魏殺智伯剝腹絕腸折頭摺頤處也蓋所未聞尋史記及新序載黃歇上秦王書曰智伯信韓魏從而伐趙韓魏叛之殺智伯瑤于鑿臺之下又曰韓魏父子兄弟接踵而死于秦者十世社

稷壞宗廟陳列腹絕腸折頭摺頤身首分離暴骨于
草澤此春申極言韓魏之怨秦而酈氏誤以為智伯
見屠之酷可謂疏鹵矣

其水又西南流逕武觀城西北盧諶征

艱賦曰逕武館之故邪問厥隰之遠近洞渦水又西
南為淳湖謂之洞湖津而涂水注之水出陽邑東北
大嶮山涂谷西南逕蘿磨其南與蔣谷水合水出縣
東南蔣谿魏土地記曰晉陽城東南一百一十里至
山有蔣谷大道度軒車嶺通于武鄉水自蔣谿西北
流西逕箕城北春秋僖公三十三年晉人敗狄于箕

杜預釋地曰城在陽邑南水北即陽邑縣故城也竹書紀年曰梁惠成王九年與邯鄲榆次陽邑者也王莽之繁穰矣蔣谿又西合涂水亂流西北入洞渦澤也

西入于汾

出晉水下口者也劉琨之為并州也劉淵引兵邀擊

之合戰于洞渦即是水也

一清按晉書劉曜攻晉陽劉琨使張喬拒之戰于武

灌喬敗死晉陽太守高銀等皆降琨屯榆次與左右數十騎攜妻子奔趙郡遂如常山鄴以為琨與劉淵

戰誤也

晉水出晉陽縣西縣壘山

縣故唐國也春秋左傳稱唐叔未生其母邑姜夢帝謂已曰余名而子曰虞將與之唐屬之參及生名之曰虞呂氏春秋曰叔虞與成王居王援桐葉為珪以授之曰吾以此封汝虞以告周公周公請曰天子封虞乎王曰余戲耳公曰天子無戲言時唐滅乃封之於唐縣有晉水後改名為晉故子夏叙詩稱此晉也

而謂之唐儉而用禮有堯之遺風也晉書地道記及十三州志並言晉水出龍山一云出結紉山在縣西北非也山海經曰縣壅之山晉水出焉今在縣之西

南昔智伯遏晉水以灌晉陽其川上源後人踵其遺

蹟蓄以為沼沼西際山枕水有唐叔虞祠

方輿紀要云臺駘驛

在太原縣南十里即晉澤也舊為晉水滙流處蒲魚所鍾水經注晉祠南有難老善利二泉大旱不涸隆冬不凍溉田百餘頃又有泉出祠下曰滴瀝泉其泉導流為晉水潄為晉澤今本無之

水側有

涼堂結飛梁於水上左右雜樹交蔭希見曦景至有

淫朋密友羈遊宦子莫不尋梁契集用相娛慰於晉
川之中最為勝處

又東過其縣南又東入于汾水

沼水分為二派北瀆即智氏故渠也昔在戰國襄子
保晉陽智氏防山以水之城不沒者三版與韓魏望
嘆於此故智氏用亡其瀆乘高東北注入晉陽城以
周圍溉漢末赤眉之難郡掾劉茂負太守孫福匿於
城門西下空穴中其夜奔孟即是處也東南出城流

注于汾水也其南瀆於石塘之下伏流逕舊谿東南
出逕晉陽城南城在晉水之陽曰晉陽矣經書晉荀
吳帥師敗狄於大鹵杜預曰大鹵晉陽縣也為晉之
舊都春秋定公十三年趙鞅以晉陽叛後乃為趙矣
其水又東南流入于汾

湛水出河內軹縣西北山

湛水出軹縣南原湛谿俗謂之須水也

全氏曰先司
空曰須讀作

頌是蓋聲畫鄰故字讀俱變同於三豕之誤耳其水

自谿又南流

東過其縣北又東過波縣之北

湛水南逕向城東而南注

又東過毋辟邑南

原經所注斯乃湫川之所由非湛水之間闕也是經之誤證耳湛水自向城東南逕湛城東時人謂之湛城亦或謂之隰城矣谿曰隰澗隰城在東言北非矣後漢郡國志曰河陽縣有湛城是也

又東南當平陰縣之東北南入于河

湛水又東南逕鄧南流注于河故河濟有鄧津之名
矣

水經注釋卷六